

KUVÙLUKA MUKALENGE

 Twasàkidila. Mukalenge àkubènèshè, mwanèètù wa balùme. Ndi nè disanka dya kwikala mwab'ewu, dilòòlò edi, mu Assemblées de Dieu ya ku luseke lwà Sud, bwà kukuukwila pàmwè neenù, kusànkila bwobùmwe bulenga ebu bunùdi nusànkila dībà dyònsò kakùyì mpatà to.

² Ndi ànu mucyòke ndambù. Tuvwa ku—ku Tucson makèèlèlè dilòòlò awu, bwà didyà dyà mikùùkùkù kuntwaku, nè ncyà bushùwà nè tuvwa bapicile ci—cikondo cilenga cyà dikèma. Mukalenge kutùbènesha. Nènku mvwa mushààle nsànkila bwìmpè bwàcì, ditùkù dijimà.

³ Nànku, mpindyewu, mèmè kutwilangana, kuumvwa muntu kampàndà makèèlèlè dilòòlò awu. Ncìvwakù mumanyè mwànà wa balùme wa Mwanèètù Carl Williams to. Mvwa, leelù ewu, ànu ntwa nsongààlùme kampàndà awu makumbu uvwa mujuuke nè mwakùle bwà di—didisanga dyà bansòngà awu. Ke mèmè kwambila mwanàanyi wa bakàjì. Mèmè nè: “Mpindyewu, ucìvwije bwalu bwèbè wèwè bwà kubwelamù.”

Yèyè nè: “Ncyèna mumanyè muntu nànsha umwe muntwamu to.”

⁴ Mèmè nè: “Neùmanyè muntu kampàndà, anyi muntu yònsò neàkumanyè. Bwelà wèwè ànu dibwela, mwine’s.”

⁵ Nènku ndi nsambila bwà àpetè dibàtiiza dyà Nyumà Mwìmpè mu didìsangisha edi kuntwaku.

⁶ Mèmè nè: “Nsongààlùme mulenga wàwa mwimàne mwaba awu, nè mpàla wendè ùbàlakana nè butumbi bwà Nzambì!” Nènku mvwa munkacì mwà kucyàmbulwila Billy.

⁷ Kwimanayè ànu cyanààna e kuntàngilayè, wàmba nè: “Papa, kwèna mumanyè nè awu ùvwa nganyi anyi?” Yèyè nè: “Ùvwa mmwànà wa balùme wa Mwanèètù Carl Williams.”

⁸ Èè, aci, ndi—ndi mumanyè nè udi mufùmìne ku mudibu mwìmpè. Pawikalà . . . Nwamònu anyi?

Ndi nè disànkà dyàbùngì dyà kwikala mu Phoenix dilòòlò edi.

⁹ Èè, wàwa ní kî m’Mwanèètù Pat Tyler. Udi mufùmìne penyì pa buloba, mwanèètù? Ngèèla meeji nè ùvwa wènda ùlomba beena màshinyì bwà kumwambulabò, kuumukila ànu ku New York too nè apa. Bidi ànu bu nè ke mùtùbì’s.

¹⁰ Ndi mvùluka nè mvwa mumòne Mwanèètù Gene, Mwanèètù Leo, kaaba aka dilòòlò edi, Mwanèètù Ed Daulton, bààbùngì bàà ku balundà bàanyi bàdi kaaba aka aba, nè Mwanèètù Ed Hooper.

Nènku, ekèlekèlè, lwà kuulu eku dilòòlò edi ndi nè mmwènenenu mwimpè wa bantu bônso, nè ndi mwà kukènzakana, mbimpè.

¹¹ Èè, ndi munkaci mwà kwenda kudyumvwa mucyòke ndambu mukesè. Mvwa mukolèshe ànu menemene, nènku ki twètù kwikala—kwikala... mukùngùlù mule wà mèbà. Ke mèmè... Mukàjàànyì kwambayè nè: “Amba tǔng, ndi mmòna nè udi mubange kwakwila mu dīyī dyèbè diibīdī.”

Mèmè nè: “Bìvwa bìkèngela ndyǎngate musangu ewu.”

¹² Misangu mikwàbò pàndi ngààkula, ndi mpweka, ngààkwila bikolè pa muminu, pashìishe citùpà aci cidi citàpika nè cicyòka. Ndi mbàndisha, lwà kuulu, nè ngaakwilakù, mùshindù awu. Tudi ànu nè cyà kuyiila bintu byà mishindù yònsò patùdi ànu munkaci mwà kukwàcila Mukalenge mudimu, kī mmwòmò anyi, patùdi bazengèle?

¹³ Nènku, ekèlekèlè, ndi ntèkemena nè bônso aba mbambi bàdi lwà paanyimà apa. Byòbì nànkù, ekèlekèlè, tudi banyùngulukila ànu bimpè dilòòlò edi, musumbà mulenga wà bantu bàdi basòmbe pàmwè. Èè, aci's cidi cimvùlwija mulayi, wà nè: “Tudi basòmbe pàmwè mu myaba yà mu Dyulu, mu Kilistò Yesù,” mùdì Mashi Èndè àtùkezula ku mpèkaatù yònsò.

¹⁴ Mpindyewu nēnteetè, bulelèlè, bwà kunùpàtula kumpàlà kwà dībà dilòòlò edi. Kuvùluka mpindyewu nè, mààlabà dilòòlò, netwikalè kwà Mwanèètù Shores kwàka. Ke dīnà dyèndè anyi? [Mwanèètù wa balùme kampàndà udi wamba nè: “Ncyà bushùwà.”—Muf.] Mwanèètù Shores, mu disangu dyà mùsèèsù wà Dikùmi nè ùmwè nè wà Garfield. Ke Assemblée de Dieu mukwàbò nyèyè awu mwaba awu. Èyowà. Assemblée de Dieu lwà kuntwaku, nè Assemblée de Dieu wa Kumpàlà.

¹⁵ Nè pashìishe nēngiikalè ànu nè cyà kutèeleja bakwètù bakwàbò aba bwà katanci mpindyewu, too nè ku dyàlumingu didi dilonda mu dīndà, Ndi ncinka nè, lwà ku mpungilù kwàka. Ndi... Netùpicile mu cikondo cyà dicyònkómoka cilenga be. Ndi ndyùmvwa ànu nè netùpicile mu cikondo cimpè be.

¹⁶ Nènku kiipàcilà kàànyì kàà kwikala kaaba aka kàdi mu mùshindù kampàndà, kàà, mu mùshindù kampàndà kutwishangana cyanza, nudi bamanyè's, ntwà eku nè eku bwà kukwàcishangana mwaba wònsò, nè kwenza bwobùmwè bukesè nè bānà bèètù, nè kupicisha dilòòlò kampàndà eku nè kwàka, bwà kumanyangana. Nènku—nènku pàmwàpa nyumà mukesè wa ditàbuluja ubanga kulenga bantu, nè pashìishe kwenza nè cyòci aci cilombolè, citùdiku mwà kwenza, mwòmò amu, nè pashìishe kufika mu katòngòbèlè kanène amu. Nènku ndi ngèèla meeji nè, Mwanèètù Oral Roberts ke muntu mu cikondo eci udi nè cyà kutufikisha mu katòngòbèlè ku didyà dyà mikùùkùkù mu òmwè dilwalwà edi dilòòlò. Nènku ndi mumanye nè tudi munkaci mwà kwindila cikondo cinène cyà dicyònkómoka, nè mu matùkù ònsò à lumingu àdi mashààle aa.

17 Pa nàнку nwatùsambidilaayi mpindyewu, nè kupatuka mu misèèsù, mu mpangu nè mu bibeeba. Kàdi “kubàlòmba” anyi? To. “Kubènzeja.” Kubènzeja, kubènzeja bwà kubwelabò. Bwalu eci ncifwànyine kwikala cikondo cilenga be bwà Phoenix kupeta dikùmbula dyèndè dinène dinùdi. . . Nè ndi mumanyè nè Nzambi mmuswè patùdi badilongòlòle, èyowà’s, mukalenge, patùdi badilongòlòle. Twànjibi. . . Ke bwà cinyi tudi. . . matàbuluja aa àdiku, mbwà kuteeta bwà kukùmbaja mishingà yònsò, nè kwikala mu disambila, nè kudilongolola bwà cintu eci kwenzekaci.

18 Mpindyewu, ànu kumpàlà mene kwà twètù kuseemena ku Diyì, twànjààyibi kwakula nè Mwenadi, patùdi twinyika mitù yètù mu disambila apa. Mpindyewu nè mitù yètù nè myoyi miinyika kùdi Nzambi, ndi mutwishiiibwe nè, mu batèèleji búngì nùнку, kùdi nè cyà kwikala malòmba àbúngì. Nèнку wèwè naadi, nè muswè bwà bàkuvùlùkè kùdi Nzambi, elà ànu cyanza cyèbè muulu cyanààna, nè paanyimà pàà cyòci aci, wamba nè: “Mukalenge, wamvùlukakù.”

19 Taatù wetù wa mu Dyulu, Wèwè ngudi mumanyè cidi paanyimà pàà cyònsò cyà ku byanza ebi. Udi mumanye cidi cipite mu meeji àbò, nè Wèwè udi mutàmbe nè kukùmbana bwà kwandamuna dilòmba dyònsò. Nèнку tudi tulòmba bwà Wèwè kucyèenza, Mukalenge. Tudi tulòmba bwà dyèsè Dyèbè ditùsekèlèlèkù, dilòlòlò edi, mu mùshindù wà dipòngolodiibwa dyà Nyumà Mwimpè pambidi pèètù.

20 Nè kuvùluka, Mukalenge, nè, mààlabà dilòlòlò mu—mu Assemblée de Dieu wa Kumpàlà amu, nè Wèwè neupòngololè cyàkàbidi mabènesha Èbè pambidi pèètù. Nè pashiiishe ku Ramada kwàka, dijikija dyà lumingu, Èyi Nzambi wa yààya, swàkù bwà kwikalè nkàmà yà bantu ànu yètù yà cyà bushùwà eyi misùngidiibwe. Enzàku nàнку, Mukalenge. Kwikalèku dipòngoloka dyà Nyumà mu mùshindù—mu mùshindù wà nè bibejibeji kabìyi mwà kushààla bipùwe kàbidi to, kàdi nebikèngelè bwà kumanyishabì bantu bònsò cidi munkaci mwà kwenjiibwa aci. Enzàku nàнку, Mukalenge.

21 Dimanyisheku ànu kùdi cisàmbà Cyèbè, Mukalenge. Swàkù bwà myoyi yàbò mipwekèle yifike ku diitabuuja nè yitabuuje nè netwàkidilè bintu bitùdi tulòmba ebi.

22 Dìbà adi tudi baswè kulòmba, Mukalenge, bwà aba bàdi baswè kwikala kaaba aka dilòlòlò edi kàdi kabàyikù mwà kukùmbana mwà kufika kaaba aka to. Bàdi bàsaama nè biikàle mu ntàtu, nè—nè mu ngiikàdilù yà kabàyiku mwà kufika mwab’ewu to. Tudi tubàsambila, Mukalenge. Nyumà Mwimpè àmwènekelèku muntu nè muntu yònsò.

23 Bèneshàkù bàna bèètù bàdi bafùmìne mu ntàntà mule be bapicile mu madimi à mabwe à mashikà aba. Nè bààbúngì bàcidi

mu njila, bènda bàlwa. Bàkùbèku, Mukalenge. Bàfikishekù mu dikùbiibwa dyònsò.

²⁴ Mpindyewu, bènes hàku Disangisha edi, mpaasàtà mulenga ewu, disangisha dyèndè, balubuludi bèndè, balami, nè byònsò bidìbo bàtwà nyama ku mikòlò abi, Mukalenge. Tudi tulòmba bwà Wèwè kwikala naabò nè kubàkwàcisha. Mpindyewu tudi tulòmba bwà Wèwè kutùpèesha Dìyì Dyèbè. Tudi ànu mwà kuDìbala cyanaàna, Mukalenge, nè kubala cyena-bwalu. Wèwè ngudi nè cyà kufila dyumvwija, nè tudi baKwindile. Mu Dìna dyà Yesù Kilistò. Amen.

²⁵ Mu—mu mukàndà wà Kolintò wa Kumpàlà, nshapità wa 11. Muntu yèyè...Nudi bamanyè's, pa ciibidilu nutu baswè kubala, anyi kufùnda mwaba kampàndà, kwamba nè: "Ndi..." Pàmwàpa muntu kampàndà mmuswè kupeta cintu kampàndà paanyimà pààci cidiye pàmwàpa mwà kukùmbaja pa cikaavwà cimana kwamba. Anyi bambi, nè mîngà misangu beena kwitabuuja bàà pàtupù, bàdi bàcyàngata nè—nè bàcibala cyònsò, nè bàtèeleja cikaavwa cimana kwamba. Misangu yàbùngì ntu ngènzà nànkù, kufùnda cyena-bwalu. Pa nànkù nwènu baswè kutùlondesha mu dibala dilòlò edi, buulùlaayi mu Kolintò wa Kumpàlà, nshapità wa 11, nènku netùbangilè kubala ku mvensà wa 23.

Bwalu ndi mupetè kùdì Mukalenge cìndì pàànyì munùtwàdile: Nè Mukalenge Yesù mu bufùkù bùmwebùmwe...bwàkamutungilàbo abu wàkangata dyàmpà:

Nènku pààkamanàye kusàkidila, wàkadìcibula, nè kwambayè nè: Angàtaayi, dyàyi: eci mmubidi wànyì, wùdì mucibùdìibwe bwà bwalu bwènù: nwìkalàayi nwenza nùnkù bwà kumvùluka.

Byà mwomùmwe kàbidì paanyimà yèyè wàkangata lupànzà, nè pààkamanàye kudyà didyà dyà dilòlò, kwamba nè: Eci cidi lupànzà lwà cipungidi cipyacipyà mu mashi àànyì: nwìkalàayi nwenza nùnkù, misangu yònsò yinwàlùnwa, bwà kumvùluka.

²⁶ Nènku mpindyewu bwà cyena-bwalu, ndi muswè kwangacila mwaba awu: *Kuvùluka Mukalenge.*

²⁷ Mpindyewu, mu bushùwà bwà bwalu, muntu kanà yònsò, tudi bamanyè bònsò, mu—mu èkèleeziyà wetù nè, tutu tubala cyòci eci ku mudimu wà Mèèsà à Mukalenge dilòlò dyònsò. Nènku ncyena-bwalu cinènè cyà—cyà—cyà dibala, anyi Mufùndu munène pa dîbà adi, nè cidi cyàngaciibwa mwaba awu. Kàdi mvwa muswè ànu méyì awu nè: "Bwà kuMvùluka."

²⁸ Mpindyewu, Mèèsà à Mukalenge àtu misangu yàbùngì menzela makòkyanganyì manène munda mwà bikondo byònsò, pankaci pàà beena Mishòonyì nè beena Kàtòlikè. Bàdi bàmba nè beena Kàtòlikè bàdi bàngata mèèsà à Mukalenge aa, nè

bààngata mu ditèkemena dyà nè mbênzè cintu kampàndà bwà kukumbanyinakù cintu kampàndà cimpè, bwà nè mpèkaatù yàbò yàfwidiibwakù luse mu dyenza nànkù. Beena Mishòònyì bàdi bààngata bu civùlukilu cyà nè Kilistò ùkaadi mumanè kubàfwila luse, nè bàdi bààngata mu dicyònkomoka dyà nè bàkaadi bamanè kufwidiibwa luse.

²⁹ Pòlò mmutùngùnùke nè kwamba kaaba aka, nè—nè, mùshindù wà kulwa ku mèèsà à Mukalenge. Kwòkò kwikale cintu cibi, cìlongòlòlè kumpàlà kwà twètù kufikakù. “Bwalu ewu udi udyà nè ùnwa kàyì mukumbànyine to, ùdyadya nè ùnwanwa dipiila dyèndè yèyè mwinè, kàyì ùjingulula mubidi wà Mukalenge to.” Nènku mpindyewu tudi menemene, ànu menemene nè cyà kwikala mu disambila patùdì twangata Mèèsà à Mukalenge.

³⁰ Kàdi nkàadi mudikonkèkònke misangu yàbùngì, mwàkù awu, ní tudi tukwàta naawù mudimu mu wòwò menemene, mèèsà à Mukalenge. Mpindyewu, *kwenza bwobùmwe* mbwena kwamba nè “kuyiikila nè,” nwamònu’s, “kwenza bwobùmwe nè.” Nènku ndi ndikonka ní kì mbulelèlè nè, patùdì tutwilangana mùshindù ewu mu myaba yà mu Dyulu, aci ní kì mbwobùmwe, bwà nè tudi tuyiikilangana nè Nzambì, twakula Nendè.

³¹ Nènku, díbà adi, bu twètù ànu mwà kushààla bapùwe nè kuMulekela ùtwàndamuna’s! Bintu byàbùngì, nè cìmwè cyà ku bintu bibi bitàmbe bìntù ngenza, ntu nteeta kwenza dyakula dyònsò nkààyani, kàdi—kàdi nciyi nshààla musòmbè mupùwe ntàntà bule bukumbàne bwà Yèyè kungandamuna to. Tutu twenza nànkù misangu yàbùngì mu disambila. Ndi ngèèla meeji nè bu twètù mwà kulòpola mu mwoyi wètù cìdì munda mwàwù aci, nè kucileejà patòòke kùdì Mukalenge Yesù, nè pashiishe kutwà ànu binù, nè kushààla bapùwe ànu katanci kakesè nè— nè kumòna ànu cìdìYe mufwànyine kutwàndamuna. Nwamònu anyi?

³² Nènku mîngà misangu ntu mwenze nànkù, nè mmwènenu wanyì yònsò nkòòng wàkashintuluka, nudi numòna’s. Mwà mwà kuya kaMukonka cintu kampàndà nè: “Mpindyewu, Mukalenge, bantu aba, mu bulelèlè, bàdi nè cintu kampàndà. Ndi—ndi ngèèla meeji nè bàdi naanyì dijinga kuntu kwàka.” Nènku mwà mufwànyine kutwàdija ànu kusambila, kàdi katanci aka anyi, pàanyì—pàanyì ànu musànkishibwe nè ndiswa dyà Mukalenge; kàdi, paanyimà pàà mèmè mumanè kusambila, bu mèmè ànu—ànu mwà kunèngakù ndambù mukesè, nwamònu’s, díbà adi ncishintùlùdiibwe, cyònsò mu kaabujimà, mîngà misangu, ùntuma mwaba kampàndà mukwàbò. Kuyiikilangana ànu nè Mukalenge. Kaa, bwobùmwe kaayì bwà butùmbi’s wè, ànu bwà kuya kayiikila, nè kwenza bwobùmwe, nè kwindila bwà Yèyè kwandamuna.

³³ Nènku pa kwela meeji ku Mupèrsonà munène ùdì wakula

Nendè ewu, Mufùki Yèyè mwinè, nè kuyiikilangana Nendè Yèyè wâkatèèka mwoyi wèbè mu butù bwà volcan mùdi musòmbèlè amu abu. Nè pashìishe dîngà ditùkù nebikèngele bwà wèwè kuumukamù, nè dîbà adi kwàya mwoyi wèbè kwangacila apu kùdi mu byanza Byèndè. Nè udi nè dyèsè mpindyewu bwà kwenza disungula dyèbè dyà njila walonda musùùkà awu pùùmukàwu.

³⁴ Kàdi ncintu kaayi cilenga cilaya bwà kuyiikila Nendè bashìndàmèène pa milayi Yèndè, pashìishe kuMuumvwa ùkwandamuna, wamba nè: “Byònsò mbîmpè.” Ekèlekèlè, aci—aci’s cidi cyà bushùwà cicyàmba patòòke mu cyòci. Kabyèna bikèngela bwà twètù kutàngila twitabàayi kampàndà to. Kabyèna bikèngela bwà twètù kutàngila ku—ku mēyi maswika kampàndà to. Cintu cimwèpelè cidi cìkèngela twètù kwenza nkumanya ànu cyanààna nè Yèyè ùdi ùfidila Diyì Dyèndè bujaadiki, bwà nè ncikosè bwalu, nè ke cyònsò cidìku bwàci aci. Pashìishe bujitu bùdi bùùmuka.

³⁵ Ndi mwele meeji bwà kulwa ku mèèsà aa, mutùdi tuàbìikila dilòòlò edi, bu mungààmanyi kucyàmba patòòke mpindyewu nè cidi mèèsà à Mukalenge mwab’ewu ànu mùvwàbi bifwànyine kwikala kwangata kwà citùdi tubiikila nè didyà dyà dilòòlò dyà Mukalenge aci.

³⁶ Nudi bamanyè’s, bantu bàà ku esètè kuntwaku abu mbasopàkàje cintu aci, nènku—nènku ncyèna mwà kubàlongolola pa bwalu abu to. Nènku kwàka ku nord, bàyaaya naanyi dîbà dyà kuya ku didyà dyà dilòòlò, nè bàmba nè ndidyà dyà mundaamuunya. Ndi—ndi... Bàdi bàmba nè ndidyà dyà mu dindà, nè didyà dyà mundaamuunya, nè—nè—nè—nè didyà dyà mundaamuunya. Mpindyewu, didyà dyànyì dyà dilòòlò didi dîlwila penyi? Ndi nteeta bwà kujandula. Nwamònu anyi? Nènku bàdi bàmba nè: “Kaa, s’kwàjiki.”

³⁷ Mémè nè: “Kàdi kabìvwa nàнку to, katùvwa badyè didyà dyà mundaamuunya dyà Mukalenge to. Yèyè ngwakadìbìikila didyà dyà dilòòlò, didyà dyà dilòòlò dyà Mukalenge.” Kàdi ndi ndyùm vwa ànu bu nè nkumpangike didyà dìm wè, wèwè mucibìikile, mubangè kucibìikila mùshindù awu.

³⁸ Kàdi mpindyewu patùdi tudisangisha mùshindù ewu, ke Nzambì udi upweka awu. Nènku Mèèsà à—à Mukalenge àdi bulèlèlè nkucibula, mibidi micìbulula... mubidi wà Mukalenge wutùdi twabanyangana munkaci mwètù. Mpindyewu, aci’s ke mubidi mwena diinà, wà—wà dyàmpà ditùdi tucibula edi, wùleeja Mubidi wà Kilistò.

³⁹ Nuvwaku bamòne mu Ditùkù dyà Mpenta, nè ncintu cinène kaayi citùdi naaci kuntwaku? Bwà nè, Nzambì, Yèyè wàkalombola bàna bàà Izalèlèlè mu cipèèlè awu, Yèyè, Dikunji dinène dyà Kapyà adi, nènku mu Ditùkù dyà Mpenta, Kapyà kanène aka kààkapòna, nè pashìishe kuDyàbanya munkaci mwà

bantu Bèndè. Kaa, pa kwela meeji mùshindù wùdìYe muswè bwà twètù kusòmba pàmwè mu myaba yà mu Dyulu, díbà adi, muntu nè muntu ùsànkila luuyà lwà Kapyà kàà Nyumà Mwímpè alu. “Ndimì mipandùlùke yàkasòmba pamutù pàabò bu Kapyà, ndimì ya Kapyà,” Nzambi munkaci mwà kuDyàbanya munkaci mwa Èkèleeziyà. Kaa, aci kî ncifwànyineku, nànsha nànkù, kulàkusha ànu myoyi yètù nè kapyà. Apu’s ke patùdì mwà kudisanga mu myaba yà mu Dyulu.

⁴⁰ Mpindyewu, tudi bamanyè nè mèèsà Èndè, mùdì bantu basòmbè pàmwè nè bàyiikila Nendè, mbyenzè bu mwaba wà màyi wà mu cipèèlà. Nènku mwaba wà màyi wà mu cipèèlà, mu cipèèlà amu, mùdì musùlù munène, mùdì beena lwendu bazengèle bàlwa nè bàsòmba banyùngulùkile dijiba dyà màyi edi mu cipèèlà, nè—nè kupeta cyashima, nè díbà adi kuvùluka mwàkafikàbu kuntwaku.

⁴¹ Nènku mùshindù awu ngùdìbi mu Èkèleeziyà, nè, mèèsà à Mukalenge aa mùdì mabènesha ònsò à Nzambi, Èvànjeeliyò mu kaabujimà, byònsò bìdì naabì Nzambi bwà Èkèleeziyà Wendè, mbipàtula, bitèeka munkaci mwètù. Nènku ncyenzè ànu bu—bu mwaba wà màyi wà mu cipèèlà cyà luuyà lukolè, cyà cilàkuka kapyà, cyà mpèkaatù citùdì munkaci mwà kupicilamù eci. Nè pashìishe patùdì tubwelamù, nè tuyiikila, tubala cikèbelu aci, nè pashìishe tudi tumòna nè Ùdì ùkùdimuka, nè Yèyè kî ngùcipàtukilakù mu *cikampàndà*, anyi ùcipàtukilakù mu *cikansanga*, anyi muumùshe *cikampàndà*, kàdì Yèyè ùdì umwèumwè awu makèèlèlè, leelù, too nè kashidi. Yèyè’s ùdì nè bintu byònsò pa cikèbelu, mudìlongòlola bwà kubyàbanya. Aci’s ke luseke lwímpè. Díbà adi tudi ànu mwà kwosha dísu ku cikèbelu aci nè kwangata cintu cyònsò nkòong. Ntu ànu muswè bwà kucyàngata, ntu muswè cintu aci mu kaabujimà, kî mmwòmò anyi? Ntu muswè ànu kucyàngata.

⁴² Nènku patùdì tusànkila mabènesha aa, muntu yònsò munkaci mwà kuumvwa Bwikadi Bwèndè, nè wàmba nè: “Amen. Nzambi àtumbè! Àlèluuyàh!” nè bikwàbò, mu cyòci aci tudi mwà kuvùluka Ewu wakatùtwàdilabi nè kubivwija byà bipeteka awu, lufù lwà Mukalenge Yesù Kilistò, Mwànà wa Nzambi. KuMuvùluka. Ndi ngèèla meeji nè ke cìdì, misangu yàbùngì, tudi pàmwàpa tusànkila mabènesha àbùngì, mu mùshindù wà tupwà nè mwoyi kùdìwu mafùmine kwìnè.

⁴³ Musangu kampàndà mvwa mukème bikolè. Mvwa muyè nè musumbà wà beena Kilistò bàà mu èkèleeziyà kampàndà, nè kusòmbabò bwà kudyà, kàdì kabàvwakù baalùjile Nzambi twasàkidila, bwà cyàkudyà cyàbò to. Èè, mèmè kwela meeji nè cìvwa cyenze bu cyà pabwàcì. Ke mèmè kuya ku nzùbu mukwàbò, nè bòbò, kàbìdì, kudìbwinka ànu mu didyà. Ke mèmè kukonkoloja bwalu abu. Ke bòbò nè: “Kaa, èè. Aci’s cìdì ànu, Nzambi ngudi ànu mucifile’s, nànsha bìshi. Nwamònu anyi?”

44 Mémè nè: “Cìdi cìmvùlwija ngulube mwínshì mwà mucì wà pommes, nudi bamanyè's. Pommes neyipone, nè kumutuuta ku mutù mu bule bwà ditùkù dijimà; yêyè kààkubàndishakù mèsù muulu, bwà kumòna kùdiyi yìfùmina to.”

45 Nènku aci, nudi bamanyè's, twètù, ndi ngèèla meeji nè cìdi cìtwènzela bîmpè bwà twètù kwimana nè kubàndisha mèsù muulu, bwà kumòna kùdì bintu ebi bîfùmina. Kaa, mùshindù mwinè wùdibi byà butùmbi bwà kuvùluka Mukalenge wetù's wè, kuvùluka byònsò bìdìYe mutwènzèle, nè kuvùluka nè kakùvwa muntu mukwàbò nànsha umwe uvwa mwà kubifikisha ku dzenzeka to. Kakwèna cintu nànsha cìmwè cìvwà mwà kubifikisha ku dzenzeka to ànu Mukalenge wetù. Nè Yêyè wàkacyènza mu cyanààna, pàvwàku kakùyì muntu mukùmbànyine to; kakùvwa mupròfetà nànsha umwe to, kakùvwa mwena meeji nànsha umwe to, mulombodi wa bukalenge bwalàbàle nànsha umwe, mukòokeshi nànsha umwe, mfùmù nànsha umwe to. Muntu nànsha umwe kàvwakù mwà kucyènza to pa kuumusha Mukalenge Yesù, Yêyè mwinè, nè Yêyè wàkatwènzèlaci nè budiswile bwònsò. Twànjàayi ànu kuvùluka. Yêyè mmucyènzèle bânà Bèndè munda mwà bikondo.

46 Mpindyewu twànjàayi kwakula ànu katanci kakesè pa cintu kampàndà cìikale muntu kampàndà nè cyà kuvùluka. Ndi mwà kudifwànyikijila, mu Butùmbi mwàmwa dilòdòlò edi, mùdi muntu kampàndà dìnà dyèndè Noà, kàdi ncyà bushùwà nè yêyè ùdi nè byàbúngì byà kuvùlukila Mukalenge. Bwalu mu cikondo cìvwà Nzambi nè cyà kubùtula lwonji lwònsò lùvwà pa buloba alu, Nzambi wàkavùluka Noà. Nènku Noà mmuvùlùke mwàkapàndukàye ku cìiji cikolè cyà Nzambi aci, ku luse lwà Nzambi. Mùshindù wùvwà màyi ma—manène matwàdije kutuuta mavwala mu misèèsù, nè bipeepèlè kutuutabi, nè mbwebwe bìbúnguluka ku mikùnà's! Nènku cipeepèlè cikolè kaayi cyà cikwàcisha bwòwà's wè! Nzùbu kuupukayi, nè mishimì kutaayika, nè Nzambi ùvwà nè Noà munda mwà bwàtù. Mpindyewu, aci cyòci kaciyi mwaba mulenga wà dikèma bwà kuMuvùlukila's, èyowà, èyowà, bwà kwikala munda mwà bwàtù amu, mukùbìibwe bîmpè bitàmbe mu Bwikadi bwà Nzambi, bwà kusòmba Nèndè's!

47 Dìbà adi tudi bafwànyine kubiikila kasùmbù kakwàbò kàà bantu, anyì ndikù mufwànyine kwamba nè bàsàtù, nè bààkabìikidiibwa nè Shandàlàkà, Meeshàkà, nè Abèdènègò. Mùshindù mwinè wàkangatàbo luseke lwà Nzambi, bàvùluka nè Yêyè ùtu ùshààla mukwàte ku mulayi Wèndè's! Nè mùvwàbi nè, mu dìbà dinène edi, bwà ngiimànyinù wabò awu, nànsha mene bânà bààbò bàà balùme, bààbúngì bàà kùdìbo, bakomè nyimà badìtwe mu maalu à pa buloba. Kàdi bàvwà nè cyà kwimana, nànsha nànkù, nè kwangatabò luseke lwà Nzambi. Nènku pàvwà cikùtù cyà kapyà aci citwà kapyà kakolè misangu mwandamutekète kutàmbe mùvwàbo kacya bateemèshe kapyà

kwônsò eku amu, nè bààkabàsàkila mu cikùtù cyà kapyà eci.

⁴⁸ Nè ncyà bushùwà nè bàdi mwà kuvùluka Muntu mwinâyi uvwa naabò muntwamu awu, wâkalama luuya lu—lukolè lwônsò alu nè lufù kule naabò. Kùdi cintu kampàndà pa bìdì bitàngilà Muntu mwinâyi awu. Tudi bafwànyine kwakula Bwèndè mu katanci, èyowà's, mukalenge, mùshindù wùvwàYe Umwèpelè uvwa mwà kuvwija aci cikùmbàne. Kakùvwa muntu mukwàbò nànsha umwe uvwa mwà kucyènza to pa kuumusha Muntu mwinâyi awu. Nè Yèyè ke Ewu wâkalongolola mwoyi, mu mbàngà yà lufù. Amen. Ke Yèyè—Yèyè kulaminyina ndimì yà kapyà ayi paanyimà, nè kubèèpulayè. Nènku, kaa, pàdiku ànu mwà kwikala civùlukilu, nè cyôci kacýàdyàkujiminakù to, pa nànkù bàdi mwà kuvùluka ditùkù dinène adi mu Baabùlòònà mwàmwa.

⁴⁹ Kuvwa muntu mukwàbò mu Baabùlòònà amu, udi kàbìdì mwà kuvùluka's, nènku's awu ùvwa n'Danyèlè, pààkapàngàdikàye mu mwoyi wèndè bwà nè yèyè kàvwa mwà kudikooyisha nè bintu byà pa buloba to.

⁵⁰ Aci's ke ngiimànyinu mwîmpè wa kwangata. Ke mwaba wùdì wùkèngela bwà twètù bantu kwangata, kwenza bu kutàmba kukolèshakù byà mvità ndambù. Ke cyôci aci. Katwàkudikooyisha nè bintu byà pa buloba to, nànsha èkèleeziyà mukwàbò awu wènza bìshi. Bwètù twètù, netùkolèsheku byà mvità pambidi. Netùshaalè ànu nè Dîyi adi.

⁵¹ Cidì mwà kulwa anyi kuya nànsha ciikàle cinyi, katwàkudikooyishaku to. Bakwàbò bôbò baswè kucyènza, tùngunukàayi nè kucyènza. Piikalà bakàji abu baswè kukòsa nsukì yàbò, bàyikosè. Twètù katwàkwenza nànkù to. Ncyà bushùwà. Bôbò baswè kulaaba bilaabu, bàlekèlaayi bàya. Cintàkanyì aci nànsha ciikàle cinganyì, kapenta, bàlekèlaayi bàtùngunuke nè kucyènza. Twètù katwàkucyènza to. Piikalà bakwàbò bàmba nè bàvwa mwà kunwà mfwankà nè kabìyi bibènzela bwalu to, èè, bàlekèlaayi bàtùngunukè. Kàdi twètù katwàkucyènza to. Kwajiki. Uh-huh. Bakwàbò bàdi mwà kwalukila kumbèlu, kutangalaja kàlaasà kàà Dyàlumingu—kàà Dyàlumingu kumpàlà kwà dībà, bwà ndongamu wa ku tèlèviziyo, anyi mu diisàtù dilòlò, bàpwa mwoyi disangisha dijimà bwà ndongamu kampàndà. Cidìbò bènza nànsha ciikàle cinyi, twètù netùkwacilè Mukalenge mudimu.

⁵² Netwàngatè mwaba bu Yoshùwà nè: “Bwànyì mèmè nè bàà mu nzùbù mwànyì, netùkwacilè Mukalenge mudimu.” Tudi tuvùluka cyàkenzàYe bwà kutùtwàdila dibènesha edi, nè tudì tutàmba kudinanga bikolè mu mùshindù wà katùyì mwà kudìnyangakaja mu mùshindù nànsha wùmwe to. Mbubanjì bwà Mwoyi wà Cyendèlèlè wutùdi naawù, nè mu mùshindù nànsha

wùmwè katwèna baswè kudikooyisha nè bintu byà pa buloba to, nànsha kakesè.

⁵³ Nènkù Danyèlè wàkapàngadika mu mwoyi wèndè cintu cìmwècìmwè aci, nànsha mwàkalwàye mwena mwàbò muntwamu amu; kàdi kî nku disungula dyèndè yèyè to, bwalu yèyè ùvwa mwenyi. Nènkù mwena Kilistò yònsò mulediibwe cyàkàbìdì ewu mmwenyi ànu pàdiye ùlediibwa cyàkàbìdì, bwalu yèyè mmuswikiibwe ku Dyulu. Byèndè—byèndè bintu bìdì mu Dyulu.

⁵⁴ Nènkù mwab'ewu kùkaadi cikondo kampàndà, mukàjàànyì nè mèmè, kùkaadi bidimu bitwè ku bìbìdì, ùvwa . . . Mwanèètù Mercier nè bakwàbò abu eci ncifwànyìne kubàsekesha ndambù, mutùdì mwà kwamba. Tuvwa lwà ku mwaba munène wà cisumbishidi. Nè mu cimenga cyètù, cidi . . . Kaa, kùdì batèndeledi bààbùngì, bàà ku dinà's. Kàdi tudì bamòne mu—mukàjì kampàndà uvwa mulwàte jipè, nènkù cìvwa cintu citàmbe kwikala cyà pabwàci, bwalu bìvwa bimwèka nè mukwàbò nànsha umwe kàvwa nè jipè to. Nè—nè pa nànkù tudì bamanyè bààbùngì bàà kùdìbo bàdì bimba mu kòralè nè bikwàbò byònsò. Ke . . . ke pa nànkù twètù . . . Mukàjàànyì kungambila, kwambayè nè: “Èè, bwà cinyi?”

⁵⁵ Ke mèmè nè: “Èè, udi umòna's, kî—kî mbàà kwètù to.”

Yèyè nè: “Cinyi?”

Mèmè nè: “To, bóbò kî mbàà ku bèètù . . .”

Yèyè nè: “Bóbò's mbeena Àmèrikè, kî mmwômò anyi?”

⁵⁶ Mèmè nè: “Bushùwà's. S'mbeena Àmèrikè. Bìdì mwà kwikala nànkù bushùwa.”

⁵⁷ Ndi nsangana mu dyanza dyà ngendu, mu midimu yà bwambi, mu bumpàngànjlà nè mu buloba bujimà, Ndi mbwela mu—mu Allemagne, kùdì nyumà wa ditùnga, ùbùikidiibwa nè, nnyumà wa cyena Allemagne. Nnyumà wa ditùnga. Ndi nya mu Suisse mwàmwa, ndi nsangana nè, pàabu's mbànà bààbù, bààkula mwakulu wàmba kwikala ànu wùmfwèwùmfwè awu, kàdi kùdì nyumà mukwàbò. Nwamònu anyi? Nènkù nnyumà mushiilàngàne mu Suisse. Pashiishe pàndì ndwa ku Finlande, nnyumà mushiilàngàne ànu menemene. Pashiishe ndi ndwa mu Àmèrikè, kùdì nyumà wa Àmèrikè. Ncyà bushùwà.

⁵⁸ “Èè, wèwè udi wamba nè, twètù katwèna . . .” Yèyè nè: “Twètù katwèna beena—mwàbò bàà Àmèrikè anyi? Bwà cinyi bantu bèètù bàdì, cikampàndà?”

⁵⁹ Ke mèmè nè: “Èè, udi umòna's, munanga wanyì, udi umòna's, ditùnga nè ditùnga dyònsò dìdì nè mwoyi, ku nyumà wa ditùnga adi. Aci's ke nyumà wa ditùnga nyèyè awu.”

⁶⁰ Yèyè nè: “Èè, dībà adi, katwènakù bafwànyìne kwikala nè mwoyi ku nyumà wa cyena Àmèrikè anyi?”

61 Mémè nè: “Kaa, to.” Mémè nè: “Tudi balediibwe cyàkàbidi. Tudi nè mwoyi ku Nyumà wa mu Dyulu, mùdi cijila, nè bwakàne.”

62 Nènkù twètù, katwèna beena Àmèrikè to, bwà bìdi bitàngila aci, bwalu Àmèrikè ùdi ànu ditùngà dyà pa buloba. Kàdi pàdi muntu wa mu Allemagne, wa mu Suisse, anyi kwònsò kùdiye mwà kwikala aku, pàdiye ùlediibwa mu Dyulu, ùdi ùvwàla Nyumà wa mu Dyulu. Nè ngiikàdìlù wendè nè bìdiye mwenza naabi bìdi bikèba bintu byà kuulu, kùdi Kilistò musòmbe ku dyàbalùmè dyà Nzambi. Amen. Kaa, mùshindù mwinè wùvwàbi cyàkàngela bwà twètù kuvùluka aci's wè, nè Yèyè wàkafwà bwà twàmòna mwà kukùmbana bwà kwikala bakolèshìibwe mu lumbu ku cintu eci, basàdiibwe. Ncyà bushùwà.

63 Cikùnyìibwà cìmpè cyà mubidi tumatuma kacyèna... Kabyèna bikèngela bwà wèwè kumyamina bwanga pa cikùnyìibwà cìmpè cyà mubidi tumatuma to. Bìshiishi kabyàkucilenga, mwinè to. Ncyà bushùwà. Cìshiishi nànsha cìmwè kacyèna mwà kutàcisha cikùnyìibwà cyà mubidi tumatuma to. Ncikùnyìibwà cyà cikoleshila mu nzùbu aci cìdi cikèngela kumyamina manga dìbà dyònsò, cintu kampàndà cyà dimiinu disopakaja. Kàdi's ke mùshindù awu wùdibi leelù ewu. Bikèngela bwà twètù kumyamina manga nè kwengeleka èkèleeziyà bikolè. Bìvwa bikèngela kwikalayè muntu-nkààyà mukàyàbàle wa Kilistò, musukula mu Mashì à Yesù Kilistò, nè mulediibwe kùdi Nyumà wa Nzambi. Nè bìshiishi byònsò byà pa buloba bìdi bitangalaka. Kabyèna nànsha mene bìseemena pabwìpì to, byòbi biinè. Abi mbikàyàbàle be, kàdi ndi ntèkemena nè nebiwatè. Ncyenzè bu cyakwidi cikàyàbàle, kàdi nudi bamanyè cìndi ngamba aci.

64 Kaa, mùshindù wùvwà Danyèlè, nè wàngata dipàngadika adi mu mwoyi wèndè, ùdi mwà kuvùluka bimpè difutu dyèndè's. Kàdi dīngà ditùkù twètù netùvùlukè difutu, twètù pèètù's. Pa nànkù pàakafikàye ku divùluka aci, mu dìbà dyà dikènga, Nzambi wàkatùma Mwanjèlò mu bwinà bwà ntambwe, nè kukànga mukana mwà nyama yà ntambwe, bwà kayìkadi yàlwa kumutàcisha to. Ncivùlukilu kaayi cyà dyela meeji pa bwalu abu's wè! Yèyè, mwela mu bwinà bwà ntambwe, bwalu ùvwa mupàngàdike munda mwà mwoyi wèndè bwà kusadila Nzambi, nè ùvwa mwà kuvùluka cyòci aci. Mmuni mwàkenzekàci? Cintu bu nùnkù ewu: “Nzambi mmutùme Mwanjèlò Wendè. Yèyè wàkamòna butòoke bwà mwoyi wànyì.” Kaa, ki bwalu mbwòbù abu's, butòoke bwà mwoyi wèbè. Nzambi ùvwa mwà kumòna aci mu Danyèlè, nè kiipàcìlà kèndè bwà kwenza cìvwà cijaalàme, nè Yèyè wàkatùma Mwanjèlò Wendè nè wàkapangisha ntambwe bwà kayimutàcishi nànsha kakesè to. Cìvùlukilu kaayipu's wè! Tudi bafwànyine kutùngunuka ànu kutùngunuka, nè cyòci aci.

65 Tùvùlukààyi ànu muntu mukwàbò kaaba aka mene, anyi kasùmbù kàà bantu, ke Izalèèlà awu. Pàakaditèèkà Izalèèlà

pa kaaba kààbò, bôbò biinè mu mwaba, bwà kwangata luseke lwà Nzambi. Nènkù kùvwa kùlwa mwanjèlò wa lufù dilòòlò kampàndà, uvwa nè cyà kwangata mwanààbutè wa nzùbu yònsò. Kàdi mùshindù mene wàkatùminàbo Izàlèèlà dīyī bwà kuvùluka nè mashi àvwa pa dikunji dyà ciibi. Aci's ke cintu cyàkalamina ciiji cicolè cyà Nzambi paanyimà, nè kubàlama mwaba awu, biikàle nè mwoyi, cìvwa mmashi ku ciibi. Cìvwa ncivùlukilu. Nè cyôci aci, misangu yònsò, cìcidi ànu civùlukilu, mashi pa dikunji dyà ciibi nè pa mukamba. Ndilòòlò kaayi dyà civùlukilu divwàci's wè! Nènkù cìvwa nè cyà kwalujiibwa mu—mu bikondo bicìvwa bìlwa abi, bwà nè Nzambi, mu dilòòlò adi, wàkafila dishiilangana pankaci pàa baakàne nè babi.

⁶⁶ Kaa, ncyèna mumanyè ní cìikala dilòòlò anyi to, kàdi nekùlwe ditùkù diikalà Nzambi mwà kuleeja dishiilangana didi pankaci pàa baakàne nè babi. Nènkù's neciikale civùlukilu kutùdi, bwà kumanya nè Mashi àdi bushùwà pa mukamba nè pa dikunji dyà ciibi. Nènkù mwaba wònsò wùdi utàngila, anyi dyumvwa dyèbè; udi utàngila nè mèsù èbè, nè umòna nè mwoyi wèbè. Ncyà bushùwà. Neuvùlukè nè udi utàngidila mu Mashi à Mukalenge Yesù, mùshindù wùvwà Ye mwà kucikenketa. Cikondo kaayi's wè! Bàvwa . . .

⁶⁷ Izàlèèlà ùvwa nè cikwàbò cintu cìvwàbo bafwànyine kuvùluka misangu yònsò, cyà nè pàakeelàbo cidya cyàbò pa cyàkumvwàbo Mòsà wàmba, mupròfetà munène mushindika kùdi Dīyī dyà Nzambi awu, nènkù pààkangatàbo dipàngadika dyàbò bwà kwasa lwendu...Bwalu bàakamòna Nzambi ùshindika nè mukenji wùvwàye ùtwàla awu wùvwa bulelèlà, nè ùvwa bilondèshile Mifundu, nè Nzambi ùvwa nendè. Nènkù wàkatuutakeena nè Ewu Uvwa kàyi nè dīnà ewu, dyèndè nè NDI. Ncyà bushùwà nè yèyè ùvwa mutuutakèene Nendè, bwalu bàakaMumòna ùkwàta mudimu nè Mòsà.

⁶⁸ Ke pashiishe bàvwa nè civùlukilu cikwàbò cinène, cyà nè pàakabangàbo lwendu alu, kwàkaya Dikunji dyà Kapyà kumpalà kwàbò, bwà kulombola njila. Ncivùlukilu kaayi cìvwàbo bafwànyine kwela meeji, cintu kampàndà cyà civùlukilu, cyà nè kabàvwa dijinga nè kaleeja-nord to. Amen. Ngàmbi cinyi? Kabìvwa bibàkèngela kaleeja-nord to. Bàvwa nè Bukènkè bwà Nzambi bwà kubàlombola.

⁶⁹ Cìvwa ncivùlukilu kaayi bwà beena meeji, mùshindù wùvwàbo kabàyi dijinga nè kaleeja-nord, ke Mùtootò kubàlombolawù.

⁷⁰ Ncivùlukilu kaayi cidìci kutùdi leelù ewu, bwà kwikala nè Nyumà Mwimpè bwà kutùlombola; kī ntwitabàayi kampàndà, anyi citembelu kampàndà, anyi cintu kampàndà bwà kutùlombola, anyi cintu kampàndà cikwàtakaja kùdi bantu to. Kàdi Nyumà Mwimpè ùbwelela pa dikunji dyà kweyemena dyà Dīyī, nè ùshindika Dīyī Dyèndè, nè ùjaadika nè didi—didi

bulelèlè. Ncivùlukilu kaayi mu myoyi yètù, bwà kumanya nè Nzambi udi nè mwoyi ùcidi ànu nè mwoyi. Kaa!

⁷¹ KuMuvùluka, cyàkenzàYe aci, wàkabàlombola njila mujimà too nè ku buloba bulaya, mu mùshindù ewu.

⁷² Eliyà ùvwa nè cintu cinène cyà kuvùlukilakù Nzambi, pàvwàye mwenzè mudimu wèndè, ànu menemene cyàkamwambilà Nzambi bwà kwenzayè, bwà kutùminayè mvùla dîyi, nànsha mene lumuma kalwàkumatakù to too nè pàvwàye mwà kumusòka. Kuyayè kasòmba pabwîpi nè kasùlù kàà Keelità, muntwamu. Wàkashààlamù díbà dyònsò edi. Mùshindù mwinè wùvwàye mwà kuvùluka cyôci aci's wè! Mmunyi mùvwàye mwà kupeta cyàkudyà, munda mwà bidimu ebi? Kàdi Nzambi wàkamudiishila kùdi bikòlòlò. Nzambi wa mu Dyulu! Kakwèna mpatà to nè: “Bikòlòlò ebi byàkapeta cyàkudyà penyi?” Katwèna bamanyè to, katwèna mwà kucyàmba to. Cintu cimwèpelè, cìvwàye mumanyè, yèyè wàkadilàmbula ànu ku Dîyi dyà Nzambi, dyàkalayàYe adi. Ke Nzambi kwambula bujitu bwà byònsò.

⁷³ Ke cyònsò cidi cikèngelà bwà twètù kwenza aci. Bàna bèètù, ke cyònsò cidi citùkèngelà aci, cidi ànu kuMkwàcila ku dîyi Dyèndè. Mmunyi mwikalàYe mwà kucyènza? Ncyèna mumanyè to. Kàdi, nudi numòna's, twètù tudi tuteeta kufunyika mmwènenu yètù twètù, nènku's ke mwaba wutùdi tucibwejakajila ngòwò awu.

⁷⁴ Ambàbi tũng bu yèyè mwà kwamba nè: “Kasùlù kakwàbò kàvwà kwînshì kwà kakùnà aka nkafwànyine kwikala ànu kimpè, bwalu kàdi nè màyi àbũngi mu kòkù amu”? Huh-uh. To.

⁷⁵ Ambààyibì tũng bu nè Abraham ùvwa mwelè meeji nè bìvwa bikèngela bwà kwangatayè Sodomà? Kacìvwakù mwà kwikala cyenzèke mu mùshindù mujaalàme to. Kàdi Abraham wàkangata njila uvwa Mukalenge mumulombòle, mulayi wèndè wùmwèpelè wùvwàye nè cyà kushààla mukwàtekù.

⁷⁶ Eliyà ùvwa mwà kuvùluka pàvwàye mwenze byònsò bìvwàye mwà kwenza abi. Yèyè—yèyè wàkatàndisha bakàji bònsò bàà—bàà mu ditùkù adi, bààkateetà bwà kutentula mukàji wa mfùmù wa ditùnga awu, mukàji wa mfùmù wa ditùnga, nè—nè bintu byònsò bìvwàye—bìvwàye mutàndishe abi. Nè—nè bàvwa bàmbùkila nè ng'wa kale, ngèèla meeji, ànu mununu, muntu kampàndà wa mupwekèle. Nè wàkaya, kàdi kwenza ànu menemene cìvwà Nzambi mumwambile bwà kwenza aci. Ke pashìishe kulwaci ku diteetangana dyà makàndà, mwaba wàkambàye nè: “Twànji tùmònèbi nè mbyèpi, ku bintu ebi, bìdi bilelèlè. Mpindyewu, nwènù nudi nubiikila bapròfetà bàà—bàà Baalà kuntwaku, nè—nè nubiikila bapròfetà bèndè. Nènku lekèlaayi nsokè Mukalenge.” Kaa, diteetangana dyà makàndà kaayi's wè, pàakamanyàye nè Dîyi Dyèndè divwa dicilayè.

⁷⁷ Ncinyi citùdi mwà kwamba leelù ewu twètù bu beena Kilistò, kumpàlà kwà cyena Boudhisme, Ci-Mùzùlùmànyì, anyi cintu cikwàbò kanà cyònsò eci? “Twǎnjì tùmonebi nè udi Nzambi nganyì.” Amen.

⁷⁸ Kùkaadi cikondo kampàndà, lwà mu Inde mwàmwa, mutùvwà tusanganyibwa mu—mu disangisha, nè mwòmù amu mùvwà bantu bààbùngì, kàdi bànaayi ànyì bàtaanu kulwabò ku cyambilu aku. Nènku kakùvwà mùshindù wà dicinka búngì bwà bantu bàvwà kuntwaku to. Ke mémè kusambidila mwena nsudi kampàndà mukesè. Kàvwà nè mabòko to, nè maci èndè àvwà madyà makunya, nè tupòmпокòtò tukesè. Nènku ùvwà ùteeta bwà kunguupukila, nè mémè kumuupukila, nè kumusambidila. Mukalenge kungambila cìvwà cìmutàcisha, nè—nè bwà nsòmbelu wendè.

⁷⁹ Nènku—nènku mvwa mwà kumòna ba-Rajas nè bakwàbò basòmbe pambèlu apu. Kwambabò nè: “Aci’s ndubùku, nudi numòna’s.” Udi mwà—udi mwà kumanya, mùshindù wùvwàbò bèèla meeji, cìvwàbò—cìvwàbò mwà kungaalujila.

⁸⁰ Ditùkù adi, bààkangaakidila mu ntempèlu wa ba-Jains, mwaba wùvwà ntèndeleeleu mitwè ku dikùmi nè mwandamutekète mishìilàngàne muntwamu, nè yònsò wa ku yòyi ùbèngangana nè bwena Kilistò, nè: “Kakùvwakù cintu nànsha cimwè mu bwena Kilistò to.”

⁸¹ Kàdi, dilòòlò adi, Nzambi kushintulula ndongamu. Twètù kubanga kubala ku cikèbelu aci, ku mushimì Wèndè awu. Ke Nyumà Mwìmpè kubanga kubuulula. Nènku paanyimà pàà katancì, Indien kampànda kulwayè mwaba awu, nè ùvwà mpofo. Mémè kwamba nè: “Muntu ewu ùdi mpofo. Twètù bònsò tudi mwà kumòna aci. Kàdi yèyè’s mmuntu musèlàngàne. Ùdi nè bàna bàà balumè bàbìdì.” Mémè kwamba nè: “Nènteelè dìnà dyèndè ku dileetà ku dileetà. Ncyèna—ncyèna mwà kudishindumunakù to.” Nènku aci cìvwà ànu menemene cyà bushùwà. Nènku ndi—nènku mvwa mwà. . .

⁸² Bòbò bàdìbò bàbìikila nè mbantu bàà cijila, nè bònsò abu kuntwaku, nè baakwidi bàà ba-Mùzùlùmàanyì abu, nè basòmbe mwaba awu. Nè pa nànkù bòbò—bòbò kumanya dìbà adi, kudyàmbidilabò nè mvwa munkaci mwà kubala meeji ààbò, lubùku.

⁸³ Ke nànkù kwenzekabi nè ngèlè mèsù paanyimà, ke mpofo ewu, ànu mu cikèenà-kumòna pamutù apu, mwimànè mwaba awu munkaci mwà kuntàngila. Kaa, ekèlekèle! Nudi bamanyè’s, musadidi wa Nzambi, Nyumà Mwìmpè, ùkaavwa mumanè kutwàla. . . cìvwà cìfùnda pa cikèbelu, nudi bamanyè’s. Mémè kumanya nè cìvwà pabwìpì bwà kufidiibwa kùdì bantu.

⁸⁴ Mémè nè: “Mpindyewu, bàvwà bangambila leelù ewu nè ntèndeleeleu wa ba-Mùzùlùmàanyì ke udi mutàmbe bunène pa buloba, nè beena Bouddha, nè bònsò.” Mémè nè:

“Mpindyewu, ndi muswè bàmwè bàà kunùdì nwênù baakwidi bàdì kuntwaku, baakwidi bàà beena Bouddha, baakwidi bàà ba-Mùzùlùmaanyì, àlwe kupèèsha muntu ewu lumònù lwèndè, bushùwà, mpindyewu, pìikalàbì nè yèyè—yèyè mmunène bikolè. Muntu ewu mmukuukwidi wa dībà. Nè twètù bônso tudi bamanyè nè, twètù bàdì biitabuujà nè yèyè ùvwa mupìile, wàkakuukwila bufuki pamutù pàà Mufùki.” Mèmè kwamba nè: “Yèyè ùvwa mupìile, nè tudi bamanyè nànkù. Kàdì,” mèmè kwamba nè, “ncyà bushùwà nè Nzambì udi Mufùki awu; nè muntu awu mmuswè kulwa bwà kukwàcila Mufùki awu mudimu; ncyà bushùwà nè Yèyè ùdì pabwìpì nè kuDimwènesha.”

⁸⁵ Mpindyewu, ndi muswè kwamba cintu kampàndà. Ncìvwa mufwànyine kwikala mucyambè nànsha byà munyì bu nè ncìvwa mumòne cìkèèna-kumòna aci to. Mvwa mumanyè cìvwà cìmpè citàmbe aci. Nudi numòna’s, ke citùdì katùyì baswè aci, bwà kwikala kudìcinkila. *Kudìcinkila* mbwena kwamba nè “udi munkaci mwà kwenda kuya mutàngile kumpàlà kùyì nè bukòòkeshi to.” Ke bwà cinyì tudi baswè kutàbaleela paùdì wamba nè cidi ng’EMU MMÜDÌ MUKALENGE WÀMBA, kacìyì ànu didìfwikajila cyanààna to, kàdì cintu kampàndà cyùdì mumanyè mu kaabujimà, cilelèlè, nè Mukalenge ngudi mucyàmbè. Ke mèmè kudyùmvwa musàmbiibwe bikolè pa kumòna cìkèèna-kumòna aci, mumanyè nè kacya kacitukù cipangile to.

⁸⁶ Ke mèmè nè: “Mpindyewu, kùdì—kùdì...Muntu ewu yèyè mupìile...Mpindyewu, ba-Mùzùlùmanyì bàdì bàmba nè mmupìile, nè pashìishe udi umuvwija mù—mù—Mùzùlùmanyì. Dìbà adi, mwena Bouddha’s mmufwànyine kwamba nè yèyè mmupìile. Nè ba-Sikhs, nè ba-Jains, nè bakwàbò abu, bônso’s mbafwànyine kwamba nè mmupìile. Kàdì’s ncyà bushùwà nè kùdì Mwakàne mwaba kampàndà.” Kaa, ekelekèlè! Kaa, cintu kaayì cyà butùmbi’s wè! Pashìishe mèmè kwamba nè: “Mpindyewu, Ewu wàmupèèsha lumònù awu, yèyè ewu’s mmulayè nè ùvwa mwà kukwacila Nzambì awu mudimu.”

⁸⁷ Yèyè ùvwa mushààle mpofo, ku ditàngila dyà ku dībà, bwalu cìvwà n’nzambì-dìbà. Nwamònu anyì? Nènku ùvwa wèla meeji nè aci cyàkafuta njila wèndè bwà kuya mu Dyulu. Mpindyewu, tudi mwà kuvùluka Kilistò nè, Yèyè—Yèyè wàkakènga kacìyì bwà kutùshipa mèsù to, kàdì bwà kutùpèèsha lumònù. Nwamònu anyì? Nànkù dībà adi, nè bu... .

⁸⁸ Mèmè nè: “Mpindyewu, Ewu wàlwa kupàtula cyôci eci awu, mèmè nèndondè kasùmbù aku.” Mèmè nè: “Nènkwaicile Ewu udi umupèèshulula lumònù lwèndè awu mudimu.” Kàdì aci’s ke cìvwà musùmbà wà mutàmbe kwikala wà mupùwe viiviivi wùnkààdiku pàànyì muumvwè. Muntu nànsha umwe kààkaakulakù to. Pashìishe mèmè kwamba nè: “Èè, nyèwù kùdì mwakwidi wa ba-Mùzùlùmaanyì kuntwaku mpindyewu, bwà cinyì kùyikù ulwa kumupèèsha lumònò lwèndè?” Mèmè

nè: “Bwà cinyi’s? Mbwalu kwèna mwà kucyènza to. Nànsha mémè pàànyì ncyèna mwà kucyènza to. Kàdi Nzambi wa mu Dyulu mmubiishe Mwan’Endè, Yesù Kilistò, Yèyè ngudi mundejè cikèèna-kumòna mpindyewu mene awu, nè muntu awu neàpetululè lumònù lwèndè. Byôbì kabiyi nànkù to, dîbà adi mémè ndi ntèmu wa mashimi wa Kilistò ewu. Kàdi yèyè mulùpeta, dîbà adi mémè ndi ntèmù mulelèlè Wendè. Nènku nudi nè cyà kunyi-. . . Bivwa bikèngela bwà nwènù kunyingalala, cyanaàna nudi nè cyà, nwènù. . . cyanaàna nenùfwe mu kasumbù kanùdi nusanganyibwamù mpindyewu aku.” Cikondo kaayipu’s wè! Ke mémè nè: “Mpindyewu, piikalàbi nè aci ncyà mafi, dîbà adi’s bivwa bikèngela bwà nwènù kungeela mu ndèkè nè kumpingaja buludi ku Ètats-Unis, nè kanùyì nungiitabila bwà mémè kwalukila kàbidi to.”

⁸⁹ Kaa, kàdi pàakalwà Nzambi wetù mu cyalu’s! Muntu awu, ndi mwenzè ànu mmusambidila, ùvwa mwà kumòna bîmpè ànu bu mémè kùnu. Kuyayè lubilu è kupyàye mulombodi wa cimenga kunshìngù nè kubangayè kumuupukila. Kàdi, mòna’s, byàkangata mèbà matwè ku ànaayi. Nècivwa nè bisàbaatà to, nànsha nè mpaayà mu nkooci wanyì to, nè bampùlushì kabàvwa mwà kubàlama kule naanyì to, nènku’s bàvwa bènda bèndelangana pambidi. Kàdi’s bivwa bikèngela nwènù kumòna cívwa. . .

⁹⁰ Kàdi cívwa ncinyi? Nzambi umwèumwè awu, Nzambi umwèumwè uvwa mwà kubiikila Kapyà awu, ùtùulula Kapyà bwà kuumusha mulàmbù wèndè awu, ùdi mwà kutwàla Nyumà Mwîmpè Wendè bwà kushìndika Dîyi Dyèndè nè Didi bulelèlè, bu munùdi batwishìibwe nè Aci mbulelèlè.

⁹¹ Mpindyewu, Eliyà ùvwa mutwishìibwe nè cívwa bulelèlè, ùvwa mùmwè Dîyi dyà Nzambi. Kakwèna mpatà kùdiye to.

⁹² Nè kakwèna mpatà mu mwoyi wèbè dilòlò edi to, bwà nè Nzambi ùcidi ànu ùfila Nyumà Mwîmpè mwàkenzàYe mu Ditùkù dyà Mpenta amu, nebyènzekè. Piikalàku kakùyì mpatà to bwà nè Yèyè ùtu ùshààla mukwàte ku Dîyi Dyèndè nè òndopa babèèdi, bikèngela cyènzekè. Kàdi bikèngela wikalè mutwishìibwe bwà cyôci aci. Bikèngela bulelèlè bwà ùcimònè nè mèsù malelèlè à diitabuuja, pashìishe ùciitabè nè ùshààle ànu mwimàne mwaba awu.

⁹³ Nènku ùvwa nè byàbùngì byà kuvùlukila Nzambi, pàvwàye. . . Mpindyewu ùdi nè byàbùngì byà kuvùluka, byàkenzàYe mu matùkù awu abi.

⁹⁴ Mukàji wa nsòmbelu wa masandi wàkasangana Yesù mu Suukà kuntu kwàka awu, nè ùvwa mwena Sàmaalèyà, bôbò bàvwa bushùwà bantu babèngiibwe bàvwa bulelèlè biitàbùùje Nzambi. Bàvwa benze citùpà beena Yudà nè citùpà bàà Bisàmbà byà bendè, nè bàvwa ci—cisà. Bàvwa biitàbùùje Nzambi. Nènku mukàji mukesè, wa nsòmbelu wa masandi ewu mu ngiikàdilù

wendè awu, mukooyiishibwe bikolè kùdi mpèkaatù, nènku dīngà ditùkù pāmŵāpa ūkaavwa mutekeshiibwe mu mabòkò nè bilèlè byàbò byònsò byà bakùlu abi, byà nyingù nè mbidikà, nè byà dibisukula, nè bikwàbò.

⁹⁵ Wākaya ditùkù kampàndà ku ciinà cimwècimwè cyà mâyi cyà Yakòbò aci kuntwaku, nènku ùvwa nè cyà kupwekesha mbekeci wendè—wendè awu, bwà kupeta ndambù wa mâyi. Ke kushintululayè tusùlù. Kaa, mùshindù mwinè wùdiye mwà kuvùluka nè kùvwa Kampàndà musòmbè mwaba awu wākamba nè munda Mwèndè mùvwa Mâyi àdi nè mwoyi. Ndisànka kaayi divwàci kùdiye, pàakabuululàbo mpèkaatù yèndè kùdi Ciinà cyà mâyi à mwoyi aci, nè kumwambila mwaba wùvŵāye mupùile, nè kumuumvŵija cìvŵāye mwenzè. Nènku cyàkatèeka mukenji kampàndà munda mwà mwoyi wèndè, wākamulākusha kapyà nè butùmbi bwà Nzambi; nènku mu cimenga, nè kùdi bantu.

⁹⁶ Mpindyewu, nudi bamanyè's, ncyà bushùwà nè aci kī ncikumbànàngane nè mikenji mu ditunga adi to, bwà mukàji kuyayè mu misèèsù, nè nangàngà mukàji kampàndà uvwa nè cimanyishilu cyà nsòmbelu wa masandi. Kàdi ndi nnwàmbila nè, pàakakezudiibwāye nè kunwà Mâyi matalàle awu, nuteetèbi kumwimanyika's? Cìvwa bu kuteeta—kuteeta kujima ka—kapyà, ku nzùbu kampàndà, pàakù kwikale mushipu ànu wètù mukolè ewu, nè cipeepèlè cìkolè mu cikondo cyà mushipu mukolè, cìvwa bulelèlè cipùùdila ludimì lwà kapyà alu.

⁹⁷ Kàdi kùvwa mwà kumwimanyika to, bwalu wākadi mujandùle cintu kampàndà cìvwa cilelèlè. Mpèkaatù yèndè yàkeediibwa patòòke. Nènku pàakeediibwà mpèkaatù yèndè nè maalu mabì patòòke, ùdi mwà kuvùluka dilòòlò edi, mu Butùmbi mwāmwa's. Ùdi mwà kuvùluka nè kùvwa Mpokolo bwèndè yèyè. Kùvwa mwaba kampàndà wùvwa, twitabàayi yònsò nè—nè èkèleeziyà mimubènge, kàdi nànsha nànkù yèyè kupeta mwaba wà mâyi à kunwà mu cipèèlè. Wakajandula mwaba kampàndà wùdi wùsanganyibwa Kampàndà Uvwa ucyùka. Disànkà kaayìpù's wè!

⁹⁸ Nè mùshindù mene wutùdi mwà kusànka nendè, twètù bàakadi baswikila panshi kùdi twitabàayi yìvwa yitùlalula kule nè Nzambi, nènku tudi basangàne Mpokolo mùle tètè nè Mashi makòka mu mijilu yà Èmanùwèlè. Mwómù amu tudi tujimija ngiikàdilù wetù muumàkàne awu. Nè—nè tudi banwìna ku Mpokolo nè tudi bapetà cyashima. Nènku tudi tuvùluka Ewu yàkafuta mushinga, bwà twamòna mwà kupeta Nyumà Wèndè pambidi pètètù, Yesù Kilistò, Mwànà wa Nzambi awu. Cìvùlukilu kaayìpu cyà kuvùluka's wè!

⁹⁹ Ndi ndifwànyikijila dilòòlò edi nè Hagàà awu ùvwa pèndè mwà kwikala nè cintu kampàndà cyà kwelakù meeji, yèyè pèndè, pàvŵāye mwediibwe pambèlu, bamuumvŵè bibi. Mpindyewu

kùdì bààbúngì bàà kutùdì kaaba aka bàdì mwà kwela meeji bwà Hagàa, bwa mùvwàye, bamuumvwe bibì.

¹⁰⁰ Nganyi udi wenda lwendu lujaalame pàmwè nè Nzambi, udi wangata njila mululame, nè mubùmbàkàne, kàdì kàyì mumanyè cìdì kwikala mumvwa bibì? Mèmè ndi mumvwa bibì. Muntu yònsò, nwènù bàà bèètù bònsò bàdì bàteeta kwikala nè nsòmbelu mujaalame, nè nwènù bàà bèètù bàà bakàji, mbanuumvwe bibì.

¹⁰¹ Beena mutumba bèèbè bàdì bèèla meeji nè wèwè udi wa cyena kale, nè bàdì bàteeta kukwelulwila. “Bwà cinyi kwèna ukabwela mu tusumbù etu? Nè bwà cinyi kwèna uya mu bisumbù byà banàyi bàà twartà, kaa, nè bikwàbò?” Kàdì nudi nwepele bintu abi. Mbanuumvwe bibì.

¹⁰² Ke mwàkadibo bùmfwà Hagàa bibì. Nè yèyè ùvwa nè mwanèndè mukesè wa balùme, Ishàmèlà mwànà awu, uvwa dimuma dyà munda mwèndè, wa ku dibàkà dyà mikenji nè bàyèndè Abraham. Nè yèyè ùvwa—yèyè ùvwa nsongàakàji mupika. Nè wàkafidiibwa kùdì mfùmfwèndè mukàji wa mudimu, Sarah awu, kùdì Abraham, bu mukàji; bwalu, disèlà dyà bakàji bààbúngì òvwa dipetangana nè mikenji mu miinè matùkù awu. Nènku yèyè mukàji awu ùvwa musèdiibwe kùdì mulùme awu bilondèshilàngàne nè mikenji, bwalu bàvwa bamupèesheyè. Yèyè wàkalela mwànà, ànu cìvwà ditèkemena dyàbò aci. Kakùvwa cintu nànsha cìmwè cìvwà mukàji awu mwenzè kaciyi mu cyòci to. Kàdì, nànsha nànku, muumvwa bibì kùdì mfùmfwèndè mukàji wa mudimu, nè kumwipata pambèlu mu cipèèlà bwà kufwà. Mwaba kaayi wàkusanganyiibwa’s wè!

¹⁰³ Kàdì màyi àkaavwa majikè mu mùlàngì. Muminu wà Ishàmèlà mwànà awu wùkaavwa mubangishe kuuma. Ùvwa ùdila bwà màyi. Kàdì kubiipabi’s. Nènku ànu mwoyi wà maamù ke wùdì mwà kuumvwa mwadi wà mwànà mukesè wa mu dibòkò awu, nè mishiku myùme mu—mu cipèèlà mwaba kampàndà, yà mwanèndè umwèpelè wa mu dibòkò, kàdì ùmvwa mubidi wèndè mukesè awu wènda wùminyina, nè mwikale ùpunga nè lufù. Kakùyi màyi to, ànu mbwebwe nè lusenga, ànu bu munùdì bafwànyine kutàngila mu bipèèlà byà Phoenix emu. Kaaba nànsha kàmwè. Muumvwa bibì! Cikondo kaayipu’s wè!

¹⁰⁴ Ki yèyè awu’s, mwànà wa bakàji mupika, ànu kwìnè kwònsò aku, kàdì ùteeta bwà kwenza maalù mu mùshindù mujaalame wùvwàye nè cyà kwenza awu. Kàdì’s ke yèyè ewu nè mwànà mu mabòkò èndè, kàdì mwikalè ùpunga nè lufù. Nènku ùvwa mubungàme be. Wàkamutèeka mwìnshi mwà kaacipuka kakesè. Nè kuyayè bu mu ntàntà wa mukete mukùpa nè butà, nè kutwàye binù panshi bwà kusambila. Kàdì kumwènekakù ciinà cyà màyi, kaa, èkèlekèle: “Ciinà cyà màyi cyà Ewu udi nè mwoyi nè mummòne.” Cìcìdì ànukù too nè leelù ewu. Cìvwà citèekiibwe

mwaba awu, mu mûshindû kampàndà. Ciinà cyà mâyi aci cìcidi ànukù bu civûlukilu.

105 Ncyêna mulonge kâlaasà kakûmbàne bwà kucishindumuna to. Kàdi ndi—ndi mucitèète, kùkaadi katanci, pâmvwà munkaci mwà kufûnda tuntu kampàndà tukesè. Ke mèmè—mèmè kuteeta kucishindumuna. Ncyêna mwà kucyênza to. Kàdi nudi bamanyè cìdici's. Ndi—ntu ncibiikila cintu kampàndà, cikwàbò. Mèmè nè: “Mbitàmbe bwîmpè mèmè kubènga kwamba nànkù. Necitambè ànu kuleeja dipanga dyànyi.”

106 Kàdi cintu cîmwèpelè cîndi muswè kwamba. Ndi mumanyè mwaba wûdi Ciinà cikwàbò cyà mâyi cyàkatèèkiibwà mu Ditùkù dyà Mpenta. Cìdi ànu cikàngula dilòlò edi ànu mwàkadici cikondo cyàkakàngudiibwàci kale wàwa, nè mâyi àdi ànu nè cyashima kùdi mulùme yònsò anyi mukàji yònsò udi muswè kulonda njila mujaalame pàmwè nè Dîyi dyà Nzambi awu, nè kwenda Nendè.

107 Ndi ndwa ku ciinà cyà mâyi eci, mvûluka Yesù Wakacivwija cikûmbàne bwà mèmè, mwenyi, mwànà wa mukwàciki wa maalà, mufwànyine kulwa ku Ciinà cyà mâyi aku nè kufwidiibwa luse ku mpèkaatù yànyi, nè kunwà Mwoyi wà Cyendèlèlè.

108 Kaa, mûshindû mwinè wûvwà Hagàà nè cyà kwikala mudyûmvwè pààkamònàye ciinà cyà mâyi aci's wè! Cyàkasungila mwoyi wèndè nè wà mwanèndè mulela awu. Ncyà bushûwà nè ûdi mwà kuvûluka mwaba wà mâyi wà mu cipèèlà awu, matùkù èndè ônsò à mwoyi, nè dîbà dyônsò—dyônsò dîdiye mwà kuàvûluka adi.

109 Tudi bafwànyine kutûngunuka, nè bantu. Kàdi, twánjàayibi ànu kwela meeji ku eci, kanûpangidikù kumòna ciinà cyènù cyà mâyi aci mpindyewu to. Kanûpangi kumòna dikeji dyà cyashima dîdì dîtwalà Mwoyi edi to.

110 Yesù wàkatûmiibwa kùdi Helòòdè bwà... kuumuka kùdi Pilaatù kuya kùdi Helòòdè, bwà tuseku. Cyàkapangilaye's! Bwalu bûvwà cinyi—cinyi nè Pilaatù?

111 Nè pashiishe pàakatùmà Pilaatù Yesù kwà Helòòdè, nè pashiishe mùvwà Helòòdè mukùtākāne. Dîbà adi, ûkaavwaku muumvwè bàākula Bwèndè, nè ûkaavwa mùmvwè bàākula bwà mudimu Wèndè wà bwambi. Nè Pilaatù mwikāle mwena Yudà... Anyi, Helòòdè, ngèlā meeji nè ke mwàkadîbi, Helòòdè ûvwā mwēna Yudā. Nè mwimāne mwaba awu kumpālā Kwèndè! Kàdi's ke yèyè awu, mwimāne mu Bwikadi bwà ewu uvwa baprófetā bônso bambe biprófetā pa bwalu Bwèndè, kwambwila ànu ku Edènā kwāka. Mwimāne mu Bwikadi, kàdi kàākalōmba difwidiibwa dyà luse ku mpèkaatù wèndè to. Yèyè kacya—yèyè kacya—yèyè kacya... Ndi ndikonka ní ûvwakù mene wēla meeji, wēlakù meeji à cyākābidi, à civwā, Nganyī uvwa mwimāne

kumpàlà aku? Kacya kàvwa pàmwàpa mumanyè Mwena—Mwena mu Bwikadi mùvwàye mwimàne amu to.

¹¹² Kaa, wêwè udi wamba nè: “Aci’s cìvwa—aci’s ncintu cyà cyènza bwôwà! Aci’s cìvwa ncintu citàmbe bukùtakàne.” Ki mùvwàci bushùwa. Cìvwa cintu cyà citàmbe kukùtakana cìkaavwàku muntu awu mwenzè kacya. Èè, tudi twela meeji bwà—bwà mùshindù wùvwàye mubi.

¹¹³ Kàdi anjì indilaayi kakesè. Tudi nè bantu leelù ewu bàdi bènza cintu cìmwècìmwè aci, biimàne ku Mpokolo wumwèwumwè awu, kàdi batùngùnùke ànu nè kwenza cilèmà cìmwècìmwè cyàkenzàye aci.

¹¹⁴ Bapròfetà bònsò, munda mwà bidimu binunu binaayi bàvwa bàMufunkuna. Kàdi bwalu Yèyè kààkalwa mu mùshindù ùvwà twitabàayi yàbò ayi, myàmbè nè Neàlwe, bààkaMwipata.

¹¹⁵ Mwaba awu, s’ncyà bushùwà menemene. Ncyà bushùwà menemene. Èyowà’s, mukalenge. Bàcidi ànu bàMwipata. Bòbò kí mbaswè kwikala naaci bwalu to, ànu cyòci cilwè bilondèshile mukàndà wàbò, nudi bamanyè’s, mùshindù wùdì mukàndà wàbò wà kubala wùcibala, nudi numòna’s. Bikèngela cìlwe mùshindù awu.

¹¹⁶ Kaa, bapròfetà bònsò munda mwà bidimu binunu binaayi abu bàvwa baakùle Bwèndè, kàdi’s ki Yèyè ewu mwimàne kumpàlà kwèndè, kàdi yèyè kààkambakù cintu nànsha cìmwè cyà nè, kulòmba difwidiibwa dyà luse to. Ki yèyè awu mu Bwikadi, nè—nè dyula dyà mèyi ònsò à bapròfetà bàà beena Ebèlù abu, mwimàne ànu kumpàlà kwèndè, kàdi kààkalòmbakù difwidiibwa dyà luse to. Wàkashààla ànu kacya wìmana mwaba awu. Kaa, aci’s cìvwa cintu cyà cikwàcisha bwôwà’s!

¹¹⁷ Kàdi tudi twenza cintu cìmwècìmwè aci leelù ewu. Cibi, tudi biimàne ku luseke Lwèndè, paanyimà pàà bidimu binunu bisambòmbò. Tudi twenza cilèma cinène kutàmbe cyà Helòdè, nè Pilaatù, nè—nè Kaayifà, nè baakwidi bàà mu ditùkù adi, bwalu tudi nè bidimu bikwàbò binunu bìbìdì byà majaaniki bisàkidila. Nè tucidi ànu twenza cilèmà cìmwècìmwè aci. Ànu, ndi ànu. . .

¹¹⁸ Ndi ngèèla meeji nè—nè Helòdè kààkacyèlela meeji à dîsù dikolè nànsha.

¹¹⁹ Mpindyewu, ndi ànu ndìkonka mùshindù wà dîsù dikolè wutùdì twela meeji pa Bwalu ebu. Mmùshindù wà dîsù dikolè kaayi wunùdì nuteeta kutwà Dìyì edi musinga? Dìyì adi dìdì dyùmvwija cinyì bwèbè wêwè? Nudi bamanyè nè n’Nzambi mu mmwènekèlu wa mutuuta ku cyamù anyi? Kàdi tudi twendelapù, bwà twitabàayi wa mùshindù kampàndà, nè twamba nè: “Matùkù à bishimà àkaadi mamanè kupita. Docteur Jones mmwàmbè *cikampàndà*, pa nànkù aci’s ncikòse bwalu.” Kàdi, pèèndè, Bible ewu mmutèeka mu makàjiinyi ònsò à mikàndà, pàmwè nè ònsò, mu cisumbishidi cyònsò cyà Bible, mu

maèkèleeziyà. Nè bambi, nè bikwàbò, biimàne mwaba awu, nè bacibadila pamutùpamutù, kàdi bàcilèngulula, bwà twitabàayi, bàteeta bwà kucyàluja mu cikondo cikwàbò kampàndà.

¹²⁰ Ànu mûmwà mwambè díyì adi, misangu yìbìdì anyì yisàtù kacya ànu ngíkala mu Phoenix, ncitamba kundenga be. Bantu bàtu mùshindù awu. Bàtu misangu yònsò ànu bàtùmbisha Nzambi bwà citùYe mwènzè, nè bindile cyènzàYe, kàdi bàpanga kumanya cidiYe munkaci mwà kwenza mpindyewu mene. Bàdi bènza nàнку. Bàdi bàpanga kucimòna.

¹²¹ Mpindyewu, pàmwàpa Helòòdè ùvwa mwà kwikala mutùmbishe Nzambi bwà mwàkapàtulàYe bàna mu cipèlèl, nè bikwàbò. Nè kwambabò nè: “Dìngà ditùkù Yèyè neàtumè Maasiyà. Butùmbi kùdì Nzambi’s wè! NetùMumònè díbà adi.” Kàdi’s ke Yèyè ewu, mwimàne ànu kumpàlà kwàbò mene, kàdi kabàvwa baMumanyè nànsha.

¹²² “Yèyè ùvwa pa buloba, nè buloba bwàkenjiibwa kùdìYe, kàdi bàà pa buloba kabààkaMumanya to. Kàdi bònsò bààkaMwakidilà abu, kùdìbo...wàkabàpèèsha bukolè bwà kulwabò bàna bàà Nzambi.” Mèmè ntu munangè aci. Èyowà’s, mukalenge.

¹²³ Mu Bwikadi Bwèndè amu, ndi ngèèla meeji nè yèyè kààkeelakù meeji nè dísu dikolè pa bwalu abu to.

¹²⁴ Nè bààbùngì leelù ewu bàdi benza cintu cìmwècìmwè aci, kabàyi bàcyàngata nè dísu dikolè to. Kabèèna bàngata meeji à dísu dikolè to. Bàdi bèèla meeji nè: “Mpindyewu mona, ntu nya mu èkèleeziyà, nè ndi mwîmpè ànu mùdì wèwè amu.”

¹²⁵ Mpindyewu, kwèna ànu muswè kwangata lwidì alu to. Udi mwà kwikala mwîmpè bu mèmè, kàdi kubènga kwikala mwîmpè nànsha kakesè. Nwamònu anyi? Kàdi kanwèna baswè kuvwija muntu nànsha umwe cileejilu cyènu to. Udi muswè kuvwija Nzambi Cileejilu cyèbè, Yesù Kilistò, nè muswè kwangata Díyì Dyèndè. Nènku pawìkalà kùyì... .

¹²⁶ Mpindyewu, vùlukàayi nè, Bible mmwàmbè nàнку, lwà mu mukàndà wà Bwàkabuulwibwà amu. Eci ke dibuulula mu kaabujimà dyà Yesù Kilistò. “Ewu yònsò wadidìnga kuumushilaKù Díyì dimwèpelè, anyì kusàkidilaKù díyì dimwèpelè awu, cyèndè citùpà necyùmushiibwè ku Mukàndà wà Mwoyi.” Pa nàнку Aci’s ke Dibuulula.

¹²⁷ “Nzambi mu bikondo byà kale nè mu mîshindù mîshîlèshîlàngàne,” Ebèlù 1: “wàkaakula nè baataatù kùdì bapròfetà, kàdi mu matùkù à ndekeelu aa ku Mwan’Èndè, Kilistò Yesù.” Nènku, Kilistò, mwikàle ùDibuulula, ùDimanyisha, wàngata Díyì Dyèndè nè ùDikolesha ànu cyanààna.

¹²⁸ Mwimàne dîngà ditùkù, munkaci mwà kwakula, ngèèla meeji, nè Mwanèètù Carl Williams nè, kùvwa dibwè dyà ngaji.

Ngèèla meeji nè ùvwà m'Mwanèètù Carl, anyi muntu kampàndà. Ke mèmè nè: "Awu kî mmuci mulenga anyi?"

Yèyè nè: "Èyowà's."

Mèmè nè: "Ncinyi aci? Butù bwà volcan."

¹²⁹ Ke cyònsò cìdiku ncyôci aci, lupwishi lwà buloba, lwikàle nè mwoyi munda mwàlù. Nè mwoyi awu wùvwà mmwoyi wà mùshindù kampàndà, wàkawènzà dibwè dyà ngaji. Mukwàbò ngòwò ewu mwimàne, mmuci wà mùshindù mushiilàngàne. Mmuci wà mfigi. Ncinyi aci? Butù bwà volcan bífùmina pa buloba, nè mwoyi wà mfigi munda mwàbù.

¹³⁰ Èè, tùtàngilè's. Twètù tudi cinyi? Byà mwomùmwè nè mucì awu, butù bwà volcan, kàdi biikàle nè mwoyi wà muntu munda mwàwù. Nè mwoyi wà muntu awu ngwà pa buloba, nè ùdi nè cyà kwalukila ku buloba.

¹³¹ Kàdi kùdi Mwoyi wùdi wùfùminà mu Dyulu wùdi muntu naawù nè mwoyi ku Mwoyi awu, M'Mwoyi wà Cyendèlèlè.

Mùshindù mwinè wùdibi bikùtākàne's wè! Katwènakù bafwànyine kwela aci meeji nè dísù dikolè anyi, balundà bàànyì?

¹³² Mpindyewu, kî ndisaluka to. Kî ndilama dyà twitabàayi yàbùngi to. Ndilabula kampàndà. N'Dilediibwa. Dyàmbedi, bikèngela ùlabulè lufù kumpàlà kwà wèwè kumòna mwà kufila bujaadiki bwà Dilediibwa. Bu mùdi, cijaalàmijè mu mùshindù mujaalàme's: wenza dilabula dyà lufù, nè pashìishe kwikala ntèmu wa Dilediibwa. Dimiinu kanà dyònsò edi didi nè cyà kwenza cintu cìmwècìmwè aci. Nènku Dimiinu *edi* didi Nzambi. Nè pàdiDi ditèèkiibwa mu mwoyi wèbè, didi dipàtula Dilediibwa dyà mwànà wa Nzambi.

¹³³ Nènku ke mùshindù awu wùvwà Yesù pàvwàYe pa buloba. Yèyè kwamba nè: "Nganyì udi mwà kuMpiisha bwà mpèkaatù? Nganyì udi mwà kuMbanda, èyowà's, bwà mpèkaatù?" *Mpèkaatù* mbwena kwamba nè "bupidyà." "Panwikalà—panwikalà kanùyì mwà kungiitabuuja Mèmè to, itàbùùjaayi byenzedi." "Kenkètaayi Mifundu. Mu Yòyì amu mmunùdi nwela meeji nè nudi nè Mwoyi wà Cyendèlèlè. Yòyì ayi's ke Yidi yimfidila Mèmè bujaadiki. Yòyì ayi's ke Yidi yàmba nè Mèmè ndi Nganyì. Nènku pangiikalà nciyi nkumbanangana nè dikùmbanyina adi to, ànu menemene cyàkambà Mifundu aci, cyàkamba Taatù nè Ndi mwà kwikala, pàndi Mèmè ndwa; Mèmè nciyi nkumbanangana naaci to, dībà adi Ndi mwenze cilèma."

¹³⁴ Kaa, patwikalà twètù beena Kilistò, twètù bambi, twètù balùme, bakàji, beena Mpenta, nè bakwàbò bònsò bàà ku twètù, patwikalà katùyì mwà kwangata cidi Nzambi mwàmbè nè ke cìvwà Èkèleeziyà Wendè nè cyà kwikala to, twètù katùyì mwà kufika ku cipidi cidiYe mwàmbè to, dībà adi tudi mwà kupiishibwa bwà mpèkaatù, bwà bupidyà. Tudi tuteeta kwamba nè matùkù à bishimà àkaadi mamanè kupita,

nè bintu bikwàbò byònsò ebi, *cikampàndà*, nè *cikansanga*, nè *cikankènga*, díbà adi tudì mwà kubandiibwa bwà bupidyà. Bwalu, kùdi mpèkaatù ànu umwèpelè, nè mwinè awu mbupidyà. “Ewu udi kàyi wítabuujà mmumanè kupiìshiibwa.” Nwamònu anyì? Kwèna nànsha mwà kufika pa cishìmikidi cyà kumpàlà to pawìkalà kùyi wítabuujà. “Ewu udi ulwa kùdi Nzambi ùdi nè cyà kwítabuujà nè Yèyè ùdikù, nè m’Mufuci wa aba bàdi bàMukèba nè lukunukunu.” Pa nàнку ambàbi tũng bu èkèleeziyà. . .

¹³⁵ Ke cìdi Nzambi muswè ncyòci aci. Ke ciìkalà Nzambi naaci aci, musumbà wà bantu bàdi mwà kwamba nè: “Yesù Kilistò wàkalaya cinyi? Ncinyi cìdi cilayìibwe mu matùkù à ndekeelu aa cìdi kaciyi cimwènèshiibwe kutùdi?” Amen. Díbà adi tudì mwà kusòmba panshi, kuMuvùluka, kuMuvùluka patùdi tusangila pàmwè.

¹³⁶ Kwòkò cintu kampàndà citùdi bapangile, tucyènzàayi. Kwòkù cintu kampàndà citupangike, twàlukilàayi ku cyòci aci. Tuvùlukàayi cyàkalòmbàYe, kí ncitùdi twètù twela meeji nè bìvwa bikèngela bwà twètù kwikala naaci to, kàdi cyàkambàYe nè bìdi bikèngela bwà twètù kwikala naaci. Nwamònu anyì? Bikèngela tucipetè mùshindù awu, mùshindù wùdi Ye mucyàmbe awu. Kàdi ndi ndikonka ní tudì ànu. . .

Twètù tudì twamba nè: “Èè, mèmè—mèmè—mèmè’s ndi wa mu *cikampàndà*.”

¹³⁷ Ndi ndikonka ní nudi bacyèlekù meeji nè dísu dikolè, bwà kumanya nè aci kaciyèna nè cìdici cyùmvwija kùdi Nzambi to. Aci kaciyèna nè cìdici cyùmvwija to. Helòodè pàmwàpa—pàmwàpa kwambayè nè: “Èè, mpindyewu anjì indilà kakesè kaaba aka. Nudi bamanyè nè mèmè ndi nganyì anyì?” Nwamònu anyì? Yèyè kàakeelakù meeji nè dísu dikolè nànsha. Nènku’s bìvwa bikèngela bwà twètù kwela meeji nè dísu dikolè.

¹³⁸ Nudi bamanyè cyàkenzàye anyì? Pààkatèèkiibwà Kilistò kumpàlà kwèndè, bwà musangu wà kumpàlà, uvwa bapròfetà bònsò, beena meeji, nè munda mwà bikondo byònsò, bàvwa baakùle bwà Kampàndà uvwa ulwa ewu. Kàdi’s ki Yèyè awu mwimane ànu kumpàlà kwèndè. Nudi bamanyè’s, wèndè. . . kùdi. . . Mu mpungà awu, wuvwa Nzambi mutèèke Kilistò kumpàlà kwà Helòodè, yèyè wàkalòmba ànu dicyonkomojanga.

¹³⁹ Ndi ndikonka’s, bàna bèètù. Twèlanganàayikù meeji nè dísu dikolè mpindyewu. Twètù beena Mpenta, ndi ndikonka ní tudì tupeta Nyumà Mwimpè ànu bwà dicyonkomojanga. Kàdi’s kùdi citàmbe nè aci cìdi cyènda Nèndè. Kùdi nsòmbelu udi nè cyà kwikala mwenjìibwe. Ndi ndikonka aci ní ki ncipumbishi cyà èkèleeziyà yètù leelù ewu, bàna bèètù. Ndi ndikonka nè ki bwà cinyi tucìdi ànu münwemu mu cipèèlà emu, twenda tulalakana, pamutù pàà kwikala mu Buloba bulaya mwàmwa, munkaci

mwà kukòòkesha bintu byònsò. Ndi ndikonka ní kakwènakù cintu kampàndà citudì katùyi beelèleku meeji nè dísù dikolè dikùmbàne pa bwalu abu. Nwamònu anyi? Nudi nè cyà kwela meeji nè dísù dikolè.

¹⁴⁰ Bu Pilaatù wikala mwenze nànkù, ùvwa mwà kwikala muMulekèle. Bu—bu Helòòdè mwà kwikala mwenze nanku, ùvwa mwà kwikala muMulekèle. Kàdi yèyè kàvwa mwela meeji nè dísù dikolè to, wendè mpùngà wa kumpàlà awu.

Nènku dībà adi cyàkenzàye ncinyi? Wàkalòmba bwà kwenzayè àmwè màyelè.

¹⁴¹ Kaa, bóbò, ke cidiku leelù ewu aci's. Mbaswè kuvwija bwena Kilistò diyelè kampàndà, dijimbu kampàndà dikesè dyùdi naadi mu cyanza adi. Nènku, tèelejàayi, beena Mpenta, ikàlaayi nè meeji matòòke à mu ndòndò mu bintu ebi. Panùdi nwakula mu myakulu, nè nufila dyandamuna, nwikalè batwishìbwe nè ke dyandamuna ndyòdi adi. Nwamònu anyi? Kwikadi nè dijimbù kampàndà to. Bwà cinyi udi muswè dijimbù, pàdibi nè Nzambì ùdi nè cintu cilelèlà bwèbè? Nwamònu anyi? Bwà cinyi kwitaba mupinganyi, pàdi maulu mûle tètè nè bintu byà cyà bushùwà. Nwamònu anyi? Nwamònu anyi? Tudi nè cyà kwikala nè meeji matòòke. Kwèna nè cyà kuteeta ànu bwà kucilèngulula nè kucipicisha to. Katwèna nè cyà kwenza nànkù to. Katwèna nè cyà kulòmba màyelè to.

¹⁴² Tudi nè cyà kulòmba mudimu. Amen. “Mukalenge, byòbì bikèngela bwà mèmè kwikala cikùpwidi cyà makàsà cyà mu ciibi, mvwijèku cikùpwidi cyà makàsà cyà citàmbe bwìmpè cyùtuku Wèwè naaci aci. Cyònsò cìndi nè cyà kwikala aci, ngiikale nànkù.” Kabìyi nè: “Mvwijèku...Mèmè nciyi mwà kwikala Billy Graham, anyi Oral Roberts to, mòna's, ncyàkwikalakù cikwàbò cintu to nànsha kakesè.” Nwamònu anyi? Mòna's, wèwè s'udi mwelela meeji ànu mùdi Billy Graham nè Oral Roberts amu, bu—bu wèwè nè...bu wèwè mwikale cikùpwidi cyà makàsà, wèwè mwikale cikùpwidi cyà makàsà cyà Nzambì. Nzambì ùdi dijinga nè cikùpwidi cyà makàsà; Yèyè—Yèyè mmuswè cikùpwidi cìmpè cyà makàsà. Kwajiki. Nwamònu anyi? Kacyèna nè bwalu to.

Kàdi tudi tutùngunuka, tudicinkila nè tudi nè cyà kwikala *cikampàndà* anyi *cikansanga*. Kwènjikù nànkù to.

¹⁴³ Lòmba wèwè ànu mudimu, cyònsò cidiku aci. Nwamònu anyi? Cyònsò cidiku aci, Nzambì àkusungwilè mudimu. Nwamònu anyi? Nènku dībà adi pàdiYe ùkupèesha mudimu, vùlukà nè n'Yesù udi mukulombòle mwab'ewu. Udi mulediibwe mmu kiipàcìlà aku. Ikala mu—musadidi mwìmpè kùdiYe, nànsha mwikàle penyì. Èyowà.

¹⁴⁴ Yesù wàkamba nè: “Bwà cinyi nudi nuMbìikila ‘Mukalenge,’ kàdi kanùyì nwenza bintu bìNdì nnwàmbila bwà kwenza?” Bivwa bikèngela twètù kulonga Mifundu. Bivwa bikèngela twètù

kujandula cidi bulondyanganyi bwà ndongamu nè ndongamu wa Nzambi. Yèyè nè: “Nudi nuMbiiikila ‘Mukalenge.’” Yèyè nè: “Kàdi bwà cinyi nudi nuMbiiikila ‘Mukalenge,’ panùdi kanùyì nwenza bintu bì—bîNdi nnùtùmina dìyì bwà kwenza?” Nwamònu anyi? Èyowà.

¹⁴⁵ *Mukalenge* mbwena kwamba nè “bwena cintu.” Mwena lupangu ke mukòòkeshi wa—wa lupangu. Nènkù bantu, leelù ewu, nebiitabè Yesù nè disànkà dyònsò bu Musùngidi. Kì—kì mbaswè kuya mu ifernò to. Bòbò—bòbò nebàMwitabè bu Musùngidi. Kàdi pàkaadibi bikafika ku nè “Mukalenge,” kaa, to. Huh-uh. Nwamònu anyi?

¹⁴⁶ Mukalenge, mbwena kwamba nè, wèwè udi cintu Cyèndè. Yèyè dijinga nè cikupwidi cyà makàsà, Ùdi ùkuvwija cikupwidi cyà makàsà. Kàdi udi ànu nè disànkà, bu cikupwidi cyà makàsà, ànu mùdi mwà kwikala, bu mùtootò wà dindà. Nwamònu anyi? Nwamònu anyi? Nwamònu anyi? Nudi—nudi—nudi baswè... Tudi—tudi baswè...

¹⁴⁷ Katwèna baswè kwikala Nendè bu “Mukalenge to.” Tudi baswè Musùngidi, kàdi katwèna baswè “Mukalenge to.” Pashiishe Ùdi ùlwa bu “Mukalenge,” nè Wàkula neebè pa bintu kampàndà byà Dìyì. “Èè mpindyewu, ncyèna—ncyèna mumanyè Aci mpindyewu to, nwamònu’s. Èè, ànu... Ncyèna ànu mwà kudifwànyikijila mèmè ewu ngèza Aci to,” nwènu bainàbànza aba.

Udi wamba nè, nèngiikale mwà kucyòka paanyimà pàà katanci. To. Mèmè to.

¹⁴⁸ Nèngiikalè mùvwà muntu awu mwàmbè musangu kampàndà awu nè, wàkaya kayiisha ku ditàbuluja kampàndà. Wàkamba nè wàkayiisha pa kanyinganyinga; dilòlò diisàtù, kanyinganyinga; dilòlò diinâyì, kanyinganyinga. Wàkayiisha lumingu lujimà pa kanyinganyinga.

¹⁴⁹ Ke mpaasàtà wa èkèleeziyà nè bàmwè bàà kùdibo, kwalukilabò nè kuyiikila nendè, bàmba nè: “Mwanèètù, ncyà bushùwà nè tudi—tudi twanyisha diyiisha dyèbè. Kàdi kwènàku nè dikwàbò anyi?”

¹⁵⁰ Yèyè nè: “Kaa, èyowà’s, mukalenge.” Yèyè nè: “Ndi nè dikwàbò. Kàdi bòbò bònsò bânji banyingalalè, pashiishe nènyiishè pa cintu cikwàbò.” Pa nànkù, èyowà’s, mukalenge.

¹⁵¹ Èkèleeziyà ànji kubangila pa ABC wendè. Pashiishe netùye ku makùmi makolè dibà adi, mùshindù—mùshindù wà kwikala baprófetà, nè kupeta mapà, nè bikwàbò byà mùshindù awu. Kàdi twànji kuyiila dyàmbedi cidya cyà kumpalà eci, dyàmbedi. Kuyiila bwà kwenda kumpalà kwà wèwè kumòna mwà kunyeema lùbilu, nudi bamanyè’s. Pa nànkù, kàdi wèwè muzengèle nè mwendi wa lwà makàsà, newènzè cinyi? Èyo.

¹⁵² Kàdi tudi—tudi baswè kuvùluka Mukalenge wetù. Ke cidi cìkèngela bwà wèwè kuvùluka ncyôci aci, nè n'Yèyè ûdi ukwàcila mudimu awu. Kwèna upeta mapà aa ànu bwà kuàpetela masanka àbûngi ku ôwò. Ncyà bushùwà's. Ndekeelu wa byônsò, kùdi bààbûngi bàdi bààkula bwà mapà, bândi mutwishiiibwe, bwà mùshindù wùdìbo bènza maalu, nè kî mbamanyè nè ncinyi to. Nwamònu anyi? Nwamònu anyi?

¹⁵³ Dipà, mapà à Nzambi, nè bikwàbò, kî ncintu kampàndà cyûdi ànu unàya naaci nànsha. Mapà à Nzambi ng'à musinga mukolè, kàdi's àdi àzengesha. Àtu àcyòkesha be. Yak- ka... Mu Bwikadi bwà Nzambi, kî ndyela dyà mbilà to, Bwikadi bwà Nzambi, aci's cidi ànu mabènesha à Nzambi àdiYe ùpòngolwela pambidi pèèbè, nwamònu's, kàdi Bwikadi bwà Nzambi ncintu cyà citàcishangana.

¹⁵⁴ Ncyèna muswè nupwe mwoyi bwà kupeta mukàbà wà mèyi awu to, nwènù nè mùshindù, *Bakalenge, Tudi Dìbà Kaayi?* Nènkù nwàvùlukaayi aci.

¹⁵⁵ Yakòbò, pàvwàye mulààle pa musààmù awu, lubwebwe alu, dilòòlò kampàndà. Ke Mukalenge kumumwènekela mu cìkèenà-kumòna, nè kumònayè Banjèlò bàpweka nè bàbànda. Pààkajuukàye kuulu, wàkamba nè: “Ewu mwaba ngwà wùkwàcisha bwôwà, kî mmwaba mukwàbò to ànu nzùbu wa Nzambi.” Mwaba wà wùkwàcisha bwôwà's!

¹⁵⁶ Pààkamba Yeshàayi mupròfetà cipròfetà munda mwà bidimu byàbûngi, mu bukòòkeshi bwà Uziyà. Nènkù pààkumushiiibwa Uziyà kùdiye, bwalu wàkateeta bwà kwangata kaaba kàà mwakwidi, kàdi wàkatuucika nè nsudi è kufwàye. Nè pàmwàpa Yeshàayi ùkaavwa pàmwàpa nè bidimu makùmi ànaayi, makùmi àtaanu. Nè yèyè ùvwa mupròfetà, kaa, kacya ànu ku bwànà, bwalu bapròfetà bàdi bàlediibwa nànkù. “Mapà àbò nè mabiiikila kî mbyà dinyingaleela to.” Nènkù's ke yèyè awu, mu—mupròfetà wa Mukalenge, lwà kwînshi aku, munkaci mwà kusambila, dîngà ditùkù, nè ùtonda mpèkaatù yèndè ku cyoshelu.

¹⁵⁷ Ke dyàkàmwè, kubwelayè mu Bwikadi bwà Nzambi, nè kumònayè Nzambi musòmbe mu Dyulu, nè luzemba lwà cilùlù Cyèndè. Wàkamòna Baselèfimà nè mpàlà Yàbò yà cijila ayi mibwikidija kùdi mapwàpwà, nè makàsà Àbò mabwikila nè mapwàpwà, nè bàbùuka nè mapwàpwà, bèèla mbilà nè: “Wa cijila, wa cijila, wa cijila, Mukalenge Nzambi wa Bukolè bwônso.” Èyowà.

¹⁵⁸ Ke Yeshàayi kuvùluka dîbà adi nè lwendu lwèndè lukesè alu kalwàkadi lwimpè bikolè to. Wàkeela lubilà kaayi? Ùvwa mumanyè nè, dipà dyèndè—dyèndè, yèyè kààkenza naadi maalu mu mùshindù mujaalàme nànsha. Ùkaavwa mulalùke bikolè be. Kwambayè nè: “Mukalenge, ndi muntu wa mishikù mibiipe, nè ndi—ndi—ndi musòmbele munkaci mwà bantu bàà mishikù

mibiipe.” Ke pashiishe Mwanjèlò...Nwamònu’s, ncintu cyà cìkwàcisha bwòwà. Yèyè kwamba nè: “Dyakabi dyànyì.”

159 Kì ncintu cyà dibenesha, nè dyela dyà mbilà, nè dyela dyà mikunda to. Abi mbimpè. Mpindyewu, vùlukaayi nè, ncyèna munkaci mwà kupiisha abi to. Kàdi, ndi nnwàmbila nè, kì ng’aci cìndi ngàmba to.

160 Mbukolè nè Bwikadi bwà Nzambi, bùdì bùtwàla diciina dyà cijila, mu mùshindù wà upanga bukolè mu Bwikadi Bwèndè. Neùvùlukè misangu yònsò. Udi ànu ucivùluka.

161 Ke Yeshàayi kuvùlukayè, matùkù èndè ònsò à mwoyi. Ndi ndifwànyikijila nè, pàvwà scie munkaci mwà kukòsa mubidi wèndè, yèyè ùcivwa ànu muvùlukè mùvwà Banjèlò abu bèèla mbilà nè: “Wa cijila, wa cijila, Mukalenge Nzambi!” Cyà bushùwà’s.

162 Yakòbò, mu mèbà èndè à ndekeelu, ùvwa mwà kuvùluka mùvwà Banjèlò abu bàbànda bàpweka, nènku civwa ncintu cyà cìkwàcisha bwòwà menemene kùdiye.

163 Kì ncidi bantu bèèla meeji nè ke cyòci to. Ncintu kampàndà cyà cishilàngàne. Cidi citùkèngelà kwenza nkubwela mu Bwikadi Bwèndè, kuMuvùluka, bwà nè kì mMutùtwàle apa bwà kunaya nè kusangulujangana to, kàdi mbwà mudimu, mmutùtwàle mwab’ewu bwà—bwà kuMukwàcila mudimu.

Ùvwa nè cintu kampàndà cyà kuvùluka.

164 Kàdi bishi bwà Yudaàsà Mpongoloki awu? S’ùdi nè cintu kampàndà cyà kuvùluka, yèyè pèndè. Yudaàsà ùdi nè cintu kampàndà cidiye ùvùluka dilòòlò edi. Ncyà bushùwà nè bìdi nànkù. Nè neikalè misangu yònsò ànu ùcivùluka. Cyà bushùwà. Bwà cinyi? Wàkasumbisha Mukalenge Yesù bwà dipeta dyèndè sungasunga.

165 Ndi ndikonka, dilòòlò edi, ní kakwènakù bààbùngì bàdi munkaci mwà kwenza cintu cìmwècimwè aci leelù ewu, nusumbisha bukenji bwà bwanàabutè bwènu bwà dipeta dyènu sungasunga, dîbà dinùvwà nè cyà kwikala nulàkuka kapyà bwà Kilistò. Pàvwàbi bikèngela bwà wènu kwikala nuMwenzela cintu kampàndà, nuMukwàcila mudimu, anyi cintu kampàndà, ujuuka uya ukashàala wa mu mwaba kampàndà wùdì mwà kwikala nè nsòmbelu wa mùshindù kanà wònsò wùdì muswè awu kàdi mwikàle ànu ulàka mukana wamba mùdi mwena Kilistò. Aci’s ke cidi bàà pa buloba bàkèba dilòòlò edi. Bàà pa buloba, mùndi ngàmba, kì mmwena kwitabuuja to.

166 Mwena kwitabuuja ùdi ùkèba njila yònsò mululàme udiye mwà kwendelamù awu, bwà kudilongolola.

167 Kàdi mwena bupidyà ùdi ùkèba mwaba kampàndà wùdiye mwà kuya nè kutùngunuka ànu nè kwamba mùdiye mwena Kilistò, kàdi pashiishe kwikala ànu nè nsòmbelu wa mùshindù wùdiye muswè awu. Ke cidi ditunga edi dijinga bu mfumù wa

ditunga aci, nènku's ke cìdìbo bapetè. Menemene. Ke cìdì—ke cìdì èkèleeziyà muswè, ke cìdìbo bapetè. Èyowà's, mukalenge. Ke cinùdì nupeta ncyôci aci.

¹⁶⁸ Kàdi mwena kwitabuuja mmuswè kudìpòòpola ku bintu byònsò. “Mmuswè kutèeka mpèkaatù yònsò ku luseke, nè bujitu bùdì bumujìngìle ànu bipeepèlè nùnkù; bwà wàmòna mwà kunyeema nè lutùlùlù lwònsò lubilu lùdì lutèekiibwe kumpàlà kwèndè alu, mutàngìle kùdì Mubangi nè Mujikiji wa Diitabuuja dyètù, Yesù Kilistò.” Èyowà's. BàMuvùluke, patùdì tutèeka ku luseke bujitu bwònsò apa. Bakàjì bàlekela nsukì yàbò yileepa. Balùme bàlekela kwikala ba-Ricky, nè bàlwa mu èkèleeziyà nè bènza cìdì cìmpè, nè bintàkanyì byà mìshindù mikwàbò yònsò ebi. Nè bampaasàtà nè balami mu kasùmbù kààbò amu, basèlàngane misangu yisàtù anyì yìnaayi; nè bintu byònsò ebi, bàdya cibàngà, bwalu bantu abu bàdì bèèla mfràngà yàbùngì mu cibùcilu nè bikwàbò; bikèngela kwinamina ku bulongolodi kampàndà bwalu bàdì bàkwambila nè *cikampàndà* eci ke Cyôci, pèndè Bible wamba cintu kampàndà cyà cishìilàngàne. “Tèeka ku luseke bujitu bwònsò.”

Vùlukà Yesù. Yèyè wàkalwa kàyì mutàmbe kunangiibwe to.

¹⁶⁹ Laabì wa citende awu ùvwa Umwe wa ku Bantu bàà batàmbe bunène pa buloba, mu ditùkù òvwaYè wòndopa babèèdì nè wènza bintu byònsò bimpè adi, òndopa bantu, nè ùtàbeeja mpofo, ùleeja bantu maalù, nè ùleejila Nzambì kùdìbo, ku meeji à mu mutù wàbò sungasunga. Yèyè ùvwa mwà kwakula naabò. Yèyè ùvwa Laabì munène.

¹⁷⁰ Kàdi dīngà ditùkù kusòmbaYè panshì nè kubanga kubàmbila Bulelèlè bwà Èvànjeeliyò. Kubangila ànu apu kàcìvwa kàbìdì nè luumù to. To, Yèyè kàcìvwakù kàbìdì naalù to. Katanci aka anyì, ke musùmbà mujimà awu kuumukawù. Ke dībà adi makùmi mwandamutekète kwambabò nè: “Edi's ndiyì dikolè be. Nganyi udi mwà kudyùmvwa?” Ke bóbò kuya.

Pashìishe kjuukaYè nè kukonka bayiidi nè: “Nudi pèènú baswè kuya anyi?”

¹⁷¹ Bààkamba nè: “Kutùdì bafwànyìne kuya nkwepi, Mukalenge? Wèwè, nkààyeèbè. Tudimù lukàmà pa lukàmà. Tudi badìlongòlòle, nànsha ciikàle cinyì. Tudi badìlongòlòle bwà kuya.” TùMuvùlùkaayi mùshindù awu.

¹⁷² Vùlukàayi nè, Yèyè nguvwa Cileejilu cyètù. Wàkenza bintu byònsò, wàkapiisha Mùfaalèsà yònsò, wàkapiisha bintu byònsò byà pa buloba, wàkapiicila pa buloba kàyì katòba pa Yèyè to. Yèyè's ùvwa Mwànà wa mùkòòkò mukenketa kùdì Nzambì. KwambaYè nè: “Ewu m'Mwan'Àanyì munanga. Ndi musànkishìibwe bikolè munda Mwèndè.” Ùvwa nè nsòmbelu wa mùshindù awu.

¹⁷³ Nè pashìishe Yèyè kwangata mpèkaatù yònsò wa bàà pa buloba, mpèkaatù wanyì nè mpèkaatù webè, nè kuMutenteka

pambidi Pëndè. Nè pashiishe mene cisùulùlù cyàkapàtukà mu mpàlà Wendè wa cijila awu, bu mamata à Mashi, àsàmpukila mwaba awu. Kî mbwà nè Ûvwa mupiiile to, kàdi òvwa ndipiilà dyànyì dyàkadì dyènza nànkù, nè dyèbè dipiilà's.

174 Nènku piikalàYe mwà kwenza nànkù bwèbè wèwè nè mèmè, mmunyì mutùdiku mwà kwimana mwînshì mwà mèyì maswika kampàndà nè lukutukutu lwà pa buloba, nè bintu byà ditùkù dyà cyena leelù edì? Bivwa bikèngela twètù kuvùluka Mukalenge wetù, kuvùluka cidìYe mufutè bwà mushinga wà lupàndu ewu. Katwikadikù nè bundu bwà bwalu abu to. “Ikala pabwìpì bwà kupèesha muntu kanà yònsò mulubù bwà ditekemena didì disòmbe munda mwèbè adì.” Bivwa bikèngela twètù kwenza nànkù, bàna bèètù.

175 Tukàadi twenda tubwela mu mèbà à ndekeelu mpindyewu. Dìbà dikaadi dyènda dìbwela. Dishidimuka ndifùmìne ku Esètè. Mpindyewu didì ku Côte Ouest. Kadyèna mwà kuya kule kutàmba menemene to. Mukàlù ùdi kwàka, nè mpèkaatù yònsò wa pa buloba ùdi munkaci mwà kungwila mushiki, nè ùbùngulukila mu mavwala à bundù à Hollywood. Mmwalùkile buludì mu èkèleeziyà. Nènku ncikondo kaayì's wè! Bivwa bikèngela twètù kuvùluka aci, bàna bèètù.

176 Vùlukàayi Mukalenge wetù. Ncinyì civwàYe mufwànyine kwenza bu Yèyè mwà kwimana kaaba aka leelù ewu? Nùnkù's mmushààle mukwàte ku Dìyì adì. Munkaci mwà diteeciibwa dyònsò, Yèyè ùvwa mwà kushààla Dìyì adì. Yèyè wàkacyènza. Yèyè ùvwa Cileejilu cyèbè.

177 Pàakalwà Sàtaanà kùdìYe nè kwamba nè: “Andàmùnà mabwe aa àlwe màmpanà,” Yèyè wàkambà nè: “Bààkafùnda nè. . .” Nwamònu's, dìbà dyònsò ànu nè Dìyì dyà Taatù. Tudi nè cyà kuvùluka nè kwenza cintu cìmwècìmwè aci. Yèyè nguvwa Cileejilu cyètù. Èyowà's, mukalenge.

178 Baakwidi bàà mu ditùkù adì abu nebùikalè nè byàbùngì byà kuvùluka, bóbò pààbò. Bàdi munkaci mwà kucivùluka dilòòlò edì mu mwaba wà bajìmìne.

179 Wèwè udi wamba nè: “Mwanèètù Branham, udikù mufwànyine kubùkila baakwidi abu. . .? Baakwidi bàà cijila, nè, bàvwa bantu bàà difwànà dyà Nzambi.”

180 Mpindyewu, anji indilaayi kakesè. Bàakadivwija bóbò biinè bàà difwànà dyà Nzambi. Bàvwa nè cijila cyà mafi, difwànà dyà Nzambi òvwa kadìyì bulelèlè dyà kùdì Nzambi to. Yesù wàkabàmbila ànu patòòke nè: “Nwènù nudi bàà tatwènù dyabùlù, nè byenzedi byèndè ke binwènza.” Nè Yèyè wàkabàmbila civwàbo. Nè bàdi nè byàbùngì byà kuvùluka, bóbò pààbò. Bwalu, pàakamònàbo dimwènèshiiibwa dilelèlè dyà Maasiyà adì, dijaadika nè Yèyè ùvwa Maasiyà, bààkaCibènga nè budiswilè bwònsò bàmba nè Cìvwa nyumà mubì uvwa wenza nànkù. Bóbò nè: “Cìvwa m'Beelèzèbùlà.”

¹⁸¹ Ke Yesù kwamba nè aci cìvwa ndipenda dyà Nzambi. “Ewu yônsò wíkala mwà kwakula dīyī dībī bwà Nyumà Mwĩmpè awu kààdyàkufwidiibwakù luse to.” Bàdi nè byàbúngi byà kuvùluka. Katwàngaci kaaba kààbò to, bānà bèètù. Cìlumbù cyètù kaciikadi mùmwe nè cyàbò to.

¹⁸² Kàdi byòbī bikèngela mēmè kwikala, ngiikalèku bu Natànaèlā, ngāmba nè: “Wèwè udi Mwānā wa Nzambi. Udi Mfùmù wa Izàlèlā.” Ngīmanèku bu umwe wa ku bōbō abu. Ndekèlè ngīmanè.

¹⁸³ Nwēnù bakàjī nwīmanè bu mukàjī wa ku ciinā cyà māyī awu, mùdiye mwīmāne dilòòlò edi amu. Ùdi nè byàbúngi byà kuvùluka, mutùvwa tucyākula’s. Wàkapeta mpokolo kampāndā.

¹⁸⁴ Nènku mpindyewu, baakwidi abu, nebīikalè nè... Bàakacyēnza bwà cinyī? Bwà mukāwu ānu wètù wāà menemene ewu. Ke mùshindù wùmwèpelè ngwówò awu. Bāvwa nè lukunukunu bwà twitabāāyī wabò. Ke mùvwābo. Bāvwa nè lukunukunu bwà bilèlè byàbò. Bakùlù bààbò bàakatèèka cìlèlè cìvwa cìbèngangana nè Dīyī, kàdi’s bāvwa nè lukunukunu bwà bilèlè abi.

¹⁸⁵ Bānà bèètù, wèwè nè mēmè katùlù kulumbulula bwà aci nānsha, lukunukunu lwà cìlèlè kanā cyōnsò. Tùvùlukāāyī Yesù, cìvwaYe aci. Shāālaayī nè cyākambāYe. Ānu ku mukāwu wètù wà bulelèlā ewu, bààkenza bintu ebi. Kaa, cintu kaayipu’s wè! Eyowā’s, mukalenge. Bōbò... .

¹⁸⁶ Muntu mubanji awu ùdi nè byàbúngi byà kuvùluka, yēyè pèndè. Wàkapèebwa mpùngà wa kwakidila Yesù Kilistò, kàdi yēyè ùvwa munangè butùmbi bwà bantu kutāmba butùmbi bwà Nzambi. Nènku, vùlukāāyī nè, Bible ùdi wāmba bitòòke tòò nè yēyè wàkacivùluka paanyimā pàà yēyè mumanè kufwà nè mu ifernò, ke mukenji kwalukilawù kùdiye nè: “Vùlukāā nè, mu matùkù èbè ònsò ā mwoyi, wèwè uvwa mupetè mpùngà.”

¹⁸⁷ Nè wèwè Phoenix, udi mupetè mpùngà awu. Bàà pa buloba bàdi nè mpùngà. Kanùcilekèdiku cìpìcila mu kajila kèènù kàdi nupanga kucimòna to, mwàkenzà Helòòdè nè—nè—nè bààbúngi bàà kùdìbo.

¹⁸⁸ Mpindyewu, bàdi bàleeja nè baakwidi abu bāvwa cyà bushùwà bamanyè nè Yēyè ùvwa Nganyī, bwalu Nìkòdemè wàkacyāmba pàakalwāye. Ùvwa umwe wa ku bamfùmù bàà Bāfaalèsà. Wàkamba nè: “Laabī, tudi bamanyè nè Wèwè udi mulongeshi mufùmīne kùdì Nzambi, bwalu muntu nānsha umwe kēna mwà kwenza bintu abi Nzambi Yēyè kàyī nendè to.” Nwamònu’s, bāvwa bacimanyè. Kàdi, nwamònu’s, bàdi nè cyà kuvùluka aci. Bāvwa bamanyè cìvwa cìmpè, kàdi kabàakacyēnza to.

¹⁸⁹ Ulekela twitabāāyī webè awu ùkulamina panshì, kule nè dibàtiiza dyà Nyumà Mwĩmpè, bwalu bàdi bàkwambila nè cintu bu nānku kacitukù to.

¹⁹⁰ Mwab'ewu kùkaadi ndambù wa ngondo, mvwa nsanganyibwa ku lùpitaadi bwà kusambidila mukàji kampàndà, mu cimenga cyètù mu Indiana. Kàdi kùvwa inàbànzà kampàndà mutekète mulàadika mwaba awu, muswè kuditèeka mu bulongame nè Nzambi. Yèyè ùvwa. . . Ùvwa muntu mutwè cimpingà. Musangu kampàndà ùvwa ùya mu èkèleeziyà wanyì. Yèyè kupàtuka kwalukila. Nè, mu bushùwà bwà bwalu, démons mwandamutekète kubwelayi, mitàmbe bubì kupita mwàkadiyi kwònsò eku. Nènku ke yèyè awu mulàale, mu lùpitaadi, ùpunga nè lufù.

Yèyè nè: “Mwanèètù Branham, ncyèna muswè kufwà mùshindù ewu to.”

¹⁹¹ Ki mèmè nè: “Èyo, mwanèètù wa bakàji. Kabyèna bikèngela bwà wèwè kufwa nànkù to, pawikala ucidi ànu nè dijinga mu mwoyi wèbè bwà kukwàcila Nzambi mudimu. Kacya Yèyè kî mmukushiyekù to. Wèwè nguvwa muMushiyè, kàdi Yèyè kî mmukushiyekù to. Mpindyewu udi mwà kucyènza, bu wèwè mwà kucyènza.”

Yèyè nè: “Ndi—ndi muswè nànkù, Mwanèètù Branham.”

Mèmè nè: “Èyo, netùsambilè.”

¹⁹² Kwàkadi inàbànzà mukwàbò mulàale mwaba awu, nè mishiku milembèlèlè, kuntàngilayè nè. . . byenze bu ùvwa mwà kungeela lubilu, nè yèyè nè mwanèndè wa balùme. Ùvwa mulàale pa bulàalu; mupandiibwe, ditùkù divwà didyànji. Ke mèmè kwamba. . . Ke mèmè kumumòna, ùtàngila mwanèndè wa balùme, untàngila.

¹⁹³ Ke—ke mèmè nè: “Bìdi mwà kukutàcisha bu twètù mwà kusambilakù anyi?”

Yèyè nè: “Pwekèshà ridô awu.”

Mèmè nè: “Èè, ndi. . . Udi mwena kwitabuuja anyi?”

Yèyè nè: “Ngambi nè: ‘Pwekèshà ridô awu’s.’”

Mèmè nè: “Mèmè’s ndi ànu mukukònkè.”

Yèyè nè: “Ndi muswè bwà ùmanyè nè, twètù tudi ba-Méthodistes.”

Mèmè nè: “Èè, ncyà bushùwà nè aci cidi cicyàmba patòòke dibà adi, nwamònu’s.” Nwamònu anyi?

¹⁹⁴ Cìvwa ncinyi aci? Kàvwa muswè kumòna muntu mukwàbò, mukàji mukwàte nè byà luse, mutwè cimpingà awu wàlukila kùdi Nzambi to. Mpindyewu, bu yèyè Méthodiste, bìvwa mwà kwikala bishilàngàne, nudi numòna’s. Kàvwa muvùlùke Yesù mwaba awu to, nudi numòna’s. Yèyè wàkavùluka ànu twitabàayi wendè awu.

¹⁹⁵ Vùlukàayi ànu cyanàànà. Èyo. Kaa, ncintu kaayi cyà cyènza bwòwà cìikalàku mu Ditùkù dyà Cilumbulwidi adi’s wè.

¹⁹⁶ Kùkaadi ndambù wa mbingu mvwa ngènda mubànde pa cibàndilu mu Louisville. Mvwa mbàndakù bwà diteeta, diteeta dyà mubidi, kùdì mulundà wanyì ngàngàbukà, bwà kupeta dya—dya—dyanyisha kampàndà, bu mèmè muswè kuya dyàmwàmwà dyà mbù nè Mwanèètù Rowe nè bakwàbò abu dyàkàmwè. Nènkù ke mèmè kudyàmbidila nè mvwa mwà kudyènzejà diteeta dyà mubidi pàmvwà mupetè mpùngà awu, ke mèmè kubànda's.

¹⁹⁷ Tuvwa—tuvwa nè bantu kampàndà, twenda tubànda naabù kuulu aku. Twètù kubànda buludì, too nè mu bisàsà biipacila ku mwandamukùlù, mu Louisville, ku nzùbu kampàndà, nè, pa nànkù, nzùbu wa Heyburn. Kàdì patùkaavwà kuulu ànu kuulu menemene nè mwètù mwònsò, bwà kwimanyika, ebi. . . Umwe wa ku bakwètù aba ùvwa ùnwà ndambù wa maala, ngèèla meeji. Kukènzakanayè, kwambayè nè: “Èè, balùmyànà, ngèèla meeji nè apa ki pàdì patàmbe kutùmbuka patùdiku pèètù mwà kubànda.” Yèyè nè: “Mbìmpè tùlopokè.” Mèmè ncyàkamba cintu nànsha cìmwè to. Yèyè kàvwa mumanyè nè mvwa muiyishi to. Pa nànkù, mèmè kwindila ànu too patùvwà mwà kupàtuka.

¹⁹⁸ Mèmè nè: “Indila kakesè. Dìyì dyùvwà mwambe adi.” Mèmè nè: “Bu twètù tweyemena makumbanyina ètù twètù biinè, eci's ke butùmbùke butùdì pèètù mwà kufika, kàdì,” mèmè nè: “bu twètù mwà kweyemena Yesù, kuMuvùluka!” Amen.

¹⁹⁹ Tudi mwà kubànda kupìta apa, patùdì tupìta, ànu mwàkamba bimbi bàà Mwanèètù Outlaw dilòlòlò adi amu, Jupiter, Venus, Neptune, Mars, Njila Mutòòke wa Muulu, nè kutùngunuka, ànu nànkù, ànu nànkù. Kakwèna dishiilangana nànsha dikesè to. Dyàmwàmwà dyà ndongolwelu yònsò wa mabùlunge, mu maulu à Dyulu! Ndi nè disànkà bwà bwalu abu.

²⁰⁰ Vùlukàayi ànu nè Yèyè wàkatùngunuka nè kubànda kumutù kwà bintu bu nànkù abi. Èyowà. Twètù tweyemena makumbanyina ètù, ncyà bushùwà nè tudi bajimine. Kàdì twètù tweyemena dikumbanyina Dyèndè Yèyè, tudi basùngidiibwe.

²⁰¹ Kaa, tudi mwà kuvùluka Yesù mu ngàsà Wendè nè, Yèyè wàkatùtùntumuna nè kutùlayaci, nè, nànsha mpindyewu, mpindyewu mene, kabyèna bìkèngela bwà twètù kwikala baswikiibwe ku buloba to. Nwamònu anyi? Katwèna baswikiibwe ku buloba mpindyewu to. Tudi baswikiibwe ku Dyulu. “Tukàadi bamanè kufwà. Myoyi yètù mmisokoka munda Mwèndè, ku Kilistò.” Nè tudi babiishiiibwe Nèndè ku lufù; kì nnè, katwèna—katwèna bafwè pàmwè Nèndè to. “Tudi babiishiiibwe Nèndè ku lufù, nè tudi basòmbe mu myaba yà mu Dyulu.”

²⁰² Biikàle tuMuvùluka, basòmbe mu myaba yà mu Dyulu! “Dìbà kaayi, Mwanèètù Branham?” Mpindyewu mene. Èyowà. Katwàkubiishiiibwa pàmwè Nèndè to. Tukàadi babiishiiibwe ku lufù pàmwè Nèndè. Eci ke Mamuma à misòmù à dibiikà dyètù dyà ku lufù: buumùke ku lufù bayè ku Mwoyi, nè biikàle nè

mwoyi bwà kashidi; basòmbe mu myaba yà mu Dyulu mu Kilistò Yesù, bamanè kubiishibwa pàmwe Nendè ku bafwè. Eyowà. Ncintu kaayi cyà butumbi cidici bwà kwikala basòmbe mu myaba yà mu Dyulu nè—nè Yesù Kilistò, Mwànà wa Nzambi's wè! Eyowà's, mukalenge. Tudi mwà kuMuvùluka mpindyewu, nè milayi Yendè yònsò yidiYe mutwènzèle, patùdi basòmbe mwab'ewu mene mpindyewu apa.

²⁰³ Mwva munkaci mwà kutàngila ku ntankù wa ku cimanu uvwa paanyimà apu, kè mèmè kudyàmbidila nè: “Ekèlekèle, ndi bîmpè be. Ndi munkaci mwà kujikija mwab'ewu mpindyewu, pa dîbà mwandamutekète jaajaaja.” Ncivwa nè mabèji matwè ku àsàtù makwàbò à tuntu tufunda, kàdi mèmè kuàluja mwînshi *mwàmwa*. Ndi mwenze ànu ntàngila ku dîbà dyànyi dyà ku dibòkò, nè mèmè kumòna nè kacivwa dîbà mwandamutekète jaajaaja to. Ke mèmè kudyàmbidila nè: “Ndi mulamè dîbà bîmpè menemene.” Mwva penyi's? Mwva mujimîne dîbà dyònsò edi anyi? Mwva mumanyè nè mwva—mwva mudyũmwè bîmpè byà menemene, kàdi ncivwa mumanyè nè mwva mudyũmwè bîmpè byà nanku to. Nènkù—nènkù mwva mwà... Mwva ànu mutung'unuke nè kutàngila ku ntankù awu, kè mèmè kudyambidila nè kùdi cintu kampàndà cibì, mwaba kampàndà.

²⁰⁴ Èè, ke ciikalà mwà kwenzeka, dimwè dyà ku matùkù àdi panshi aa, balundà bàànyi. Cikondo neciìmanè. Nènkù netwàsè lwendu lwètù mu maulu tubwela mu Cyendèlèlèlè, mùdi kamùyì kàbìdi cikondo to. Kabyàkwikalakù bilenga bilayà anyi?

²⁰⁵ Kàdi patùdi basòmbe kaaba aka mpindyewu apa, mwaba wùdi cikondo kaciyi nè mushinga kutùdi to, tukaàdi bamanè kubàndishibwa mu myaba yà mu Dyulu. Tudi mwà kuvùluka cinyi? Tudi mwà kuvùluka mulayi wònsò wùdiYe mutwènzèle. “Nwènù bashààle munda Mwànyi, nè Dîyi Dyànyi diikale munda mwènù, nudi mwà kulòmba cinùdi baswè.” Ncya bushùwà anyi?

²⁰⁶ Ndi mwà kuvùluka Yone Munsantu 5.24 nè: “Ewu udi umvwa Mèyi Àanyi, nè wìtabuuja,” kàyi wìtabuuja byà budingibudingi to, mpindyewu, kàdi, “wìtabuuja Ewu udi muNtùme, ùdi nè,” aci ndibà dyà mpindyewu, “Mwoyi wà kashidi, nè kààkupicila mu dipiishibwa dyà Cilumbulwidi to, kàdi wàmanyi kuumuka ku lufù wáyi ku Mwoyi.” Nènkù tudi nè mwoyi mpindyewu mene mu Kilistò Yesù, basòmbe mu Dyulu. Ke cyàkalayàYe aci's. Tudi mwà kuvùluka.

²⁰⁷ Tudi mwà kuvùluka mwàkambàYe, kuDimanyisha Yèyè mwinè bu Maasiyà munkaci mwà bantu. Beena kwitabuuja bààkacimòna. Nènkù tudi tuvùluka nè, mu Yone Munsantu 14.12, Yèyè wàkamba nè: “Ewu udi ungiitabuuja Mèmè, byenzedi bîNdi ngèza yèyè neàbyènzè pèndè.” Tudi mwà kuvùluka nè Yèyè ngwàkalaya aci.

²⁰⁸ Tudi mwà kuvùluka nè Yèyè wàkalaya mu matùkù à ndekeelu nè Nyumà Mwîmpè neàmweneshibwè mu mubidi wà

buntu, ànu menemene mwàkenzàYe ku Sodomà kumpàlà kwà kwoshiibwayè amu. Tudi bavùlùke nè Yesù wàkenza mulayi awu. Mémè ndi mucivùlùke. Yèyè ngudi mwambè nànkù. Yesù ngudi mwambè nànkù. Mémè ndi ncìitabuujà, ànu bu nè mvwa musòmbe mwaba awu mene nè Yèyè mungambile bwalu abu, bwalu cìdi *Apa* mene, nènku mùshindù awu ke wùndi mémè ngìitabuujà Dîyì adi. Ndi mvùluka nè Yèyè ngudi mwambè nànkù. Kwàjiki.

“Byenzedi bìndi Mémè ngènta yèyè neàbyènzè pèndè.”

209 Ndi mvùluka nè, mvwa mbala mu Mifùndu, dilòlò kampàndà adi, mwaba wàkambà Yesù nè: pàdìbi nè: “Ndi nè maalu àbùngi à kunùbuulwila, kunwàmbila, kàdi nwènù. . . Ncyèna mwà kucyènta mpindyewu to. Kàdi piikalà Nyumà Mwimpè mulwè, nudi numòna’s, Yèyè neàlujululè bintu ebi ku civùlukilu cyènù, nè pashiishe Yèyè neànùleejè maalu àcilwalwà.”

210 Ndi mvùluka nè Nyumà Mwimpè wàkaakula wàmba nè: “Dîyì dyà Nzambì nditwè kutàmba mwelè wà mvità wà nseke yìbìdi, dibwela ditùbula too nè ku bwongò bwà mifubà, nè n’Djinguludi dyà meeji nè mapàngadika à mu mwoyi.”

211 Ndi mvùluka nè Yesù wàkapičila mu musumbà wà bantu dīngà ditùkù, ke mukàji mukesè kampàndà kulengayè civwalù Cyèndè. Ke yèyè kupàtuka kwàka è kusòmbela panshi, nè pambèlu apu, kujuuka kuulu, anyi kwònsò kùwàye ùsanganyibwa aku. Kè Yesù kukùdimuka nè kwamba nè: “WàNdengi awu nganyì?”

212 Pàvwàbi nè, Peetèlò ùvwa wèla meeji nè Yèyè kàvwa nè meeji Èndè mu òwù to. Yèyè kwamba nè, èè, kuMutàndisha wàmba nè: “Èè, bantu bònsò’s nyéwù bàKulenga.”

213 Yèyè nè: “Kàdi Ndi njingulula. Ndi ndyùmva nè butekète. Bukolè mbulòpòke.” KukènzakanaYè eku nè eku, kusanganaYè mukàji mukesè awu, kumwambila nè dīsaamà dyèndè dyà mashi àlwa munda adi, diitabuujà dyèndè dyàkamusungila.

214 Ndi mvùluka nè Bible ùdi ùlongesha, mu Ebèlù nè, Yèyè ùdi mpindyewu Mwakwidi Munène, kaa, udi mwà kulengiibwa kùdi dyumvwa dyà mateketa ètù. Ncyà bushùwà.

215 Ndi mvùluka nè Bible mmwambè nànkù, mu Ebèlù 13.8. Ndi mvùluka Yesù. Wàkenza. . . Mu Ebèlù 13.8, Yèyè mmwambè nè: “Yesù Kilistò ùdi umwèumwè awu makèèlèlè, leelù, too nè kashidi.” Kaa, mùshindù mwinè wutùdi mwà kuMuvùluka’s wè! Èyowà’s, mukalenge. Kaa, mùshindù mwinè wutùdi. . .

216 “Mu katanci kakesè bàà pa buloba kabàakuMmòna kàbìdi to; kàdi nwènù nenùMmòne,” Èkèleeziyà, mwena kwitabuujà awu, “bwalu Nèngìikalè neenù, munda mwènù mene, too nè ku ndekeelu kwà buloba.” Ncyà bushùwà. “Ncyàkunùshiyakù to.” Kaa, kacýèna ànu cintu kampàndà cìdi cyènzekà leelù ewu

nè mààlabà ciyè to. Ncyà Cyendèlèlè. “Ncyàdyàkunùshiyakù to. Ncyàdyàkunùlekelakù to.” Kaa, ekèlekèlè! Aci’s ncifwànyine kutùfikisha ku dyela mbilà, kwela mbilà, kudila mwadi.

²¹⁷ Tudi baswè kutàngila bwalu ebu nè dîsù dikolè. Vùlukàayi Yesù, kî ng’ànù mu mùshindù wà ku mpùùkàpùùkà to. Yèyè ngudi mulayè nùnkù. Kàdi aci cyôci kaciyi cîmpè to, dîbà adi Bible kî mmwîmpè to. Kàdi dîbà adi citùdì basòmbèlè kaaba aka ncinyi? Citùdì mene biikàdile nè mwoyi ncinyi? Cyùdì uteetela ncinyi? Diditàcisha dyèbè ndyà cinyi? Cyùdì ukwàcila mudimu mukolè nànkù ncinyi? Cyôci ciikàlè cijaalàme, nànsha mu kantu kàmwè, cìdì anyi cijaalàme mu kantu nè kantu anyi nànsha kàmwè kàà ku cyôci kî nkajaalàme to. Vùlukàayi nè, kàvwa ngwèwè anyi mèmè, anyi bampaasàtà bèènù, bàvwà benzè mulayi awu nànsha. Yesù ngwàkenza milayi eyi. Ndi mvùluka nè Yèyè ngwàkacyàmba.

²¹⁸ Ndi mvùluka nè Yèyè wàkamba nè: “Ndàayi pa buloba bujimà nùkayiishè cifùkii bwà cyònsò Èvànjeeliyò.” Too nè penyi? “Pa buloba bujimà.” Èyowà. Byàbisàtù bibidì byàbù kî mbyanjì kumanya kantu nànsha kàmwè pa bwalu bwà Kilistò to. “Buloba bujimà, kùdì cifùkii bwà cyònsò. Bimanyinu ebi nebifilè aba bàdì biitabuujà.” Ndi mvùluka nè Yèyè wàkamba nànkù. Bu mèmè mwà kuvùluka aci, mmunyi mùndiku mwà kwitaba cintu kampàndà, dîbà adi, cìdì cyàmba nè ditùkù adi ndiyè? Ndi mvùluka nè Yèyè wàkamba nè: “Pa buloba bujimà, cifùkii bwà cyònsò. Nè bimanyinu ebi nebifilè aba bàdì biitabuujà.”

²¹⁹ Mmunyi mùndi mwà kuditèèka nè kasùmbù kàà bantu bàdì bàpidya Dîyi adi, pàvwà Nzambì ùtàngila Dîyi Dyèndè, bwà kuDishindika? Mmunyi mùndi mwà kudiswikakaja nè beena bupidyà?

²²⁰ Éyi Nzambì, ndekèlè mvùluke Yesù. Ndekèlè mvùluke ngiimànyinù wakangataYè. Ndekèlè mvùluke nè Yèyè ùdi Musùngidi wanyì. Ndekèlè mvùlukè nè ndi mufwè. Neicyènàku kàbidì to. Ndi mufwè kùkaadi bidimu makùmi àsàtù nè bisàtù. Ewu n’Kilistò udi nè mwoyi munda mwànyi.

²²¹ Kàdi mèmè mutàngile kwàka nè mumumòne wènza bintu bidì kabiyi bîmpè, bibi, dîbà adi ndi mmanya nè kacya ncitukù mufwè to; William Branham ùcidi ànù nè mwoyi; wèwè ucidi ànù nè mwoyi. Paùcidi ànù ushikukila mèyi Èndè matùma, dîbà adi ucidi ànù nè mwoyi. Kàdi paùdì utùmikila dîyi Dyèndè ditùma nè: “Nwènù baNngangè, lamàayi mèyi Àanyi.”

²²² Bilenga kaayi’s wè, bwà kwela meeji nè Yèyè wàkalaya cyôci eci’s! “Mu katanci kakesè, nè bàà pa buloba kabàakuMmòna kàbidì to. Bàà pa buloba kabàakuMmòna to, kàdi nwènù nenùMmònè.” Kaa! “Mwaba wònsò wùdì bàbidì anyi bàsàtù badisangishe, Mèmè nêngiikalè munkaci mwàbò.” Ndi mvùluka aci. Udi mvùluke aci anyi, mwanèètù? [Bànà bèètù abu bàdì bàmba nè: “Amen.”—Muf.]

223 “Nè byenzedi bīNdi ngènzà, bōbò pààbò nebàbyenzè.” Mbyenzedi byà mùshindù kaayi byàkenzàYe? Ki bwalu mbwòbù abu’s. Nwamònu anyi?

224 “Kaa, èè, mu bushùwà bwà bwalu, mpindyewu, Mwanèètù Branham, aci cìvwa mbwà ditùkù dikwàbò. Kì—kì ng’aci to.”

225 Ndi mvùluka nè ke cyàkambàYe aci’s. Ncyèna mvùluka ciwàmbi wèwè aci to. Aci nciyè cyònsò, nwamònu’s, kàdi ndi mvùluka cyàkambàye Yèyè. Nwamònu anyi? “Ewu wāNdona neàdipidyè,” kupidya meeji èndè yèyè mwine, kupidya ngeelèlù wendè wa meeji sungasunga. Udi mufwànyine kupidya tatwèbè, mamwèbè, mukàjèèbè, bānà bèèbè; kàdi kùdi cintu kampàndà cilelèlā menemene mu mùshindù wà kùyi mwà kupidya Aci to. Cidi cikulama. Nè Yèyè ùdi kaaba aka.

226 Mpindyewu tùvùlukàayi ànu mulayi wònsò wàkenzàYe, patùdi twinyika mitù yètù apa.

227 Taatù wetù wa mu Dyulu, kùvwa malòmba àbùngì ànu katanci kakesè aka. Byanza byela muulu kujuukilabi mu nzùbu mujimà emu. Kàdi, Taatù, Wèwè ngudi Nzambi udi nè mwoyi. Nènku ndi nKulòmba, Mukalenge Yesù, bwà kubèneshakù bantu aba. Swàkù bwà Nyumà Mwimpè Webè àsombelè pambidi pààbò, àbàpèèshèku Mwoyi wà Cyendèlèlè, àbàpèèshèku cidìbo naaci dijinga aci.

228 Tùvùlukàku nè, Wèwè ngudi mwenze mulayi. Wèwè ngudi mwambule bujitu bwà mulayi ewu. Tùvùlukàku nè, cìdi muntu mukwàbò kanà yònsò wamba nànsha ciikàle cinyi, Wèwè ke Yèyè awu. Wèwè ke Utùdi bindile, bwà kuuja mulayi Wèbè. Wèwè ke Wakamba, nè: “Ewu udi ungiitabuuja Mèmè, nànsha byòbi nè mmufwè kàdi neikàlè nè mwoyi. Ewu yònsò udi nè mwoyi nè ungiitabuuja Mèmè kàadyàkufwàku to.” Ndi mvùluka nè Wèwè wàkamba aci, Mukalenge.

229 Nè pashìishe Wèwè wàkamba nè, aba bààkaKwitabuuja. . . Mpindyewu, Wèwè wàkamba nè, twètù biitàbùùje, tuvwa bapetè Mwoyi wà Cyendèlèlè. Nè Wèwè wakamba nè, aba bàdi bàKwitabuuja, byenzedi byŪdi mwenze bōbò mbafwànyine kubyènza kàbidi.

230 Mpindyewu, Taatù, tudi bamanyè nè Wèwè udi Nzambi, nè tudi bamanyè nè kakwèna mukwàbò nànsha umwe to pa kuumusha Wèwè. Nè tudi tuKwitabuuja, nè tudi baKweyèmène mpindyewu, mu Dìnà dyà Yesù Kilistò.

Mpindyewu, nè mitù yènù miinyika.

231 Mbanganyì mu nzùbu emu bàdi bamanyè nè kanwèna nuvùluka Mukalenge wenù mu mùshindù wùvwàbi bikèngela bwà nwènù kuMuvùluka to? Nènku ku ndekeelu kwà kaaDiyiisha kakesè, kakòsòlòke aka, udi muswè kwela byanza byèbè muulu wamba nè: “Nzambi, Dìvwijekù mulelèlā menemene kùndi too nè mungààKuvùlukà pa wanyì. . . Mèyi

Èbè matùma neikalè pa makunji à bulààlù bwànyì anyì? ‘Ndi misangu yònsò ànu ntèeka Mukalenge kumpàlà kwànyì,’ bu mwàkambà Davidi. Mukalenge, mpèèshèku byàbúngì byà Kúdi, bwà ngààmònakù mwà kuKuvùluka.” Elà cianza cyèbè muulu, wamba nè: “Nsambidilèku, mwanèètù.” Aci’s ncyenzè ànu bu nè diyì dimwè myaba yònsò. “Mukalenge Yesù, ikàlàku naanyì luse.”

²³² Mpindyewu, kùdikù aba kaaba aka dilòòlò edi bàtù kacya kabàyiku baMujikùle bu Mukalenge wenù anyì? Nènku mpindyewu nudi bafwànyine kwimana kumpàlà Kwèndè...Nè tudi banwàmbile, ànu mu katanci kakesè emu nè, Yèyè ngwàkalaya, nè: “Mwaba wùdi bàbidi anyì bàsàtù badisangishe, Mèmè nèngìkalè munkaci mwàbò.” Mpindyewu, Yèyè ngwàkalaya aci. Dìbà adi, bikèngela Yèyè ikalè mwab’ewu. Nènku kacya kùtukù muMwitàbe bu Mukalenge webè anyì?

²³³ Newènzè cintu cyà macimbu cyàkenzà Helòòdè aci anyì? Newènzè ditùulà dyà bujitù dyàkenzà Pilaatù adi, bwà kuMwela pambidi pàà mukwàbò muntu anyì? “Mààmù wanyì, ùvwa mwena Kilistò. Papa wanyì ùvwa nè ntèndeelèlu búngì bukùmbàne bwètù bònsò.” Udikù mufwànyine kwenza nànkù anyì? “Mukàjàanyì mmukàji mutèndeleeedi.”

²³⁴ Kàdi bishi bwèbè wèwè? Udikù mwà kwela byanza byèbè muulu kwamba nè: “Nzambì, wamvùlukakù. Ndi ngènzàmpèkààtù, nè ndi muswè kwikala ànu Neebè. Nèngèlè cianza cyànyì muulu?” Mbyanza búngì munyì munda emu bidì mu mùshindù awu? Kùdikù...Udi muswè kwamba nè kakwènakù ngènzàmpèkààtù mu nzùbu emu anyì? Nzambì àkubènèshè, inàbànzà. Nzambì àkubènèshè, inàbànzà, apa. Ki bwalu mbwòbù abu’s. Mwva ndyàmbidila nè kùvwa cintu kampàndà civwà cyènda bibì. Ndi...

²³⁵ Nudi bumvwè, nè, Yesù wàkamba nè Yèyè ùvwa kaaba aka. Nè Yèyè mmumanyè meeji èbè, nudi numòna’s, mu mwoyi wèbè. Twasàkidilaayi bwà meeji ènù matòòke. Mu bushùwà bwà bwalu, kùdi bakwàbò bàvwà nè cyà kwela byanza byàbò muulu.

²³⁶ Kàdi udikù mwà kwela cianza cyèbè muulu dìbà adi anyì? Wàmba nè: “Wamv-...Mwanèètù Branham, ndi—ndi ànu munkaci mwà kwenza citùpà cyà lubombo. Ndi nya mu èkèleeziyà. Kàdi pàkaadibi cyà bushùwà bifika ku diikala mulediibwe cyàkàbidi, mèmè ndi ànu nkashààla wa mu èkèleeziyà. Ncyèna bulelèlèlè mumanyè Kilistò to. Ncidi munangè maalu à pa buloba ànu mùmvwà muànanga kwònsò eku amu. Ndi—ndi ànu...Kaa, ndi nsànka bwà kuya, katèeleja diyishi kampàndà anyì cintu kampàndà. Kàdi pàkaadibi cyà bushùwà bikafika ku dyangata dìbà nè kunanga bwà kupàtuka, nè kupicishila mèbà awu pàmwè Nendè mu disambila, nè kuyiikilangana Nendè, kuMuvùluka, ncyèna—ncyèna ngenza aci to. Ncyèna nànsha mene nè dijinga dyà kucyènza to.

Ndi mumanyè dībà adi, Mwanèètù Branham nè, ncyèna mwà kwikala mujaalàme kàdi mwikàlè nè njiyà yà mùshindù awu to. Pa nànkù, ndi ngèèla cyanza cyànyì muulu kùdi Nzambì nè: ‘Ikàlàku naanyì luse.’” Elà cyanza cyèbè muulu. Ikàlà nè meeji matòòke nè cyòci aci. Ncyà bushùwà. Nzambì àkubènèshè. Ncyà bushùwà. Èyowà’s, mukalenge. Mukalenge àkubènèshè. Amen.

²³⁷ Ndi ànu mwindile cyanààna, bwà kumòna Nyumà Mwîmpè ní mmufwànyine kubuulula cintu kampàndà cikwàbò. Nzambì àkubènèshè mukalenge. Nzambì àkubènèshè. Bushùwà’s. Ndi muswè ànu bwà Yèyè kukenketa mwoyi wèbè. Ke cidiYe mulwile kaaba aka ncyòci aci. Èyo. Nzambì àkubènèshè, inàbànzà mutekète. Abi’s mbilenga be.

Ànu munùdi nucyèlela meeji amu, cyangàtaayi nè dīsù dikolè mpindyewu.

²³⁸ “Kaa, Mwanèètù Branham, bikèngela mèmè—mèmè ndwijakajè nye kumbèlu.” Tèèlejàayi. Newùlwijakajè bwà kupàtuka mu mwoyi ewu, dīngà ditùkù, kàbidì. Wamònu anyì? Elàngànaayipu meeji mpindyewu. Ke dībà ndyòdi edi. Eci ke cikondo.

²³⁹ Wèwè udi wamba nè: “Èè, ndi nkwebila’s. Mpaasàta wetù, yèyè’s—yèyè’s mmuntu wa meeji matwè, mulongè tùlaasà twà dikèma. Mbipicìibwe nè mèmè mucitèèlejile kùdi. . .”

²⁴⁰ Kacyèna nè cìdici cìshintulula to udi utwàla Mukenji nànsha yèyè nganyì. Kì—kì mmùsànjeelà awu to. M’Mukenji wùdi utèèleja. Nwamònu anyì? Nànsha bàmba nè mmuntu wa mùshindù kaayi udi mufwànyine kubwela mu ciibi mwàmwa nè—nè kukupèèsha mukenji bwà nè—bwà nè wèwè—wèwè udi mupyàne mùliyò wà ndola, udi mufwànyine kwitaba mfrangà—ayi. Itàbà difwidiibwa dyèbè dyà luse.

²⁴¹ Nè mitù yènù miinyika mpindyewu, nè mèsù ènù mabwita, nènnùlòmbèku cintu kampàndà nè meeji matòòke ònsò. Nènku ndi muswè bwà nùngambilè bulelèlè.

²⁴² Nwènù bakàji, bàdi nè nsukì mîpì abu, mbanganyì bàdiku bàdyùmvwa bulelèlè nè bìvwa bikèngela nwènù kwikala nè nsukì mile? Elà cyanza cyèbè muulu wamba. . . Nzambì àkubènèshè. Abi’s mbîmpè. Ndi mumanyè nè udi mwenzè nànkù. Ndi—ndi. . . Kùdi ditèkemena bwèbè wèwè. Kàdi paùdi mutàmbe kupapisha mwoyi, mu mùshindù wà kùyì mwà kucyènzà to, kwèna nànsha udyùmvwa mupìishìibwe to, nwamònu’s, dībà adi kùdi cintu kampàndà cikwenzèkèle. Bwalu, Diyì ndyambè nè bìvwa bikèngela bwà wèwè kwenza nànkù.

²⁴³ Mbanganyì, nwènù bakàji, bàdi bàlwàta tupùùtulu nè bilàmbà abi, anyì nunwà mfwankà; nè—nè nwènù balùme, kàbidì, bàdi bamanyè nè nudi nwenza bibì abu? Nè nwamba nè: “Ncyèna muswè kwenza nànkù to, Mwanèètù Branham. Ncyà bushùwà nè ndi munangè Nzambì, kàdi cintu aci—aci cidi ànu cindamàte. Nènku ndi mumanyè nè ncintu cibi. Nèngèlè

cyanza cyànyì muulu. Mu—mu dyela dyà cyanza cyànyì muulu, ndi ndomba bwà Nzambi àcinguumùshèku.” Ela cyanza muulu. Ikàlà nè meeji matòòke. Nzambi àkubènèshè. Ncyà bushùwà. Èyowà. Ncyà bushùwà.

²⁴⁴ Aci’s mmeeji matòòke. Aci’s ncyà meeji matòòke. Nzambi neàtùpèeshè disangisha dyà dyondopa mu katanci kakesè emu, bwà meeji matòòke awu. Tudi mwà kwitabuuja aci. Ikàlaayi nè diitabuuja mu Nzambi.

²⁴⁵ Taatù wa mu Dyulu, Udi mumòne byanza. Udi mumanyè ngiikàdilù yà bantu. Wèwè udi mumanyè cyònsò cidi mu myoyi yàbò, Mukalenge. Ndi ndomba bwà Ùfwilèku muntu nè muntu wa kùdibo luse. Nènku, mpindyewu, bàpèèshèku dijinga dyà mwoyi wàbò. Nyungishà myoyi yàbò. Enzàku nànkù, Mukalenge, bwà cìdibo naaci dijinga bwà kumanya aci. Ndi ndomba bwà Ùbàpèèshèci, mu Dìna dyà Mwan’Èbè munanga, Mukalenge wetù Yesù. Tudi tulòmba nùnkù bwà butùmbi bwà Nzambi. Ndi mbàlàmbula Kùdì, Taatù Nzambi, bwà Wèwè kwenza mudimu Wèbè munda mwàbò, mu Dìna dyà Yesù Kìlistò. Amen.

²⁴⁶ Mpindyewu, panùdì nubàndisha mutù apu, mbanganyi bàdiku buumvwe dishiilangana dyàbùngì pa bwalu abu? Èlà ànu cyanza muulu cyanààna, wamba nè: “Ndi ndyùmvwa bishiilàngàne bikolè.” Mpindyewu, mbanganyi bàdì bamanyè nè Yèyè wàkalaya nè Yèyè—Yèyè ùdì “Mukalenge ùdì wòndopa màsaamà ètù ònsò”? Nudi nwitabuuja nànkù anyi? Nudi mwà kwitabuuja anyi?

²⁴⁷ Mbanganyi bàà kunùdì bàdì biitabuuja nè Yèyè wàkalaya cyòci eci, nè: “Katanci kakesè bàà pa buloba kabààkuMmòna kàbìdì to, kàdì nwénù nenùMmònè”? Nudi nwitabuuja nànkù anyi? [Disangisha didi dyàmba nè: “Amen.”—Muf.] Nudi nwitabuuja nè bìdì mwà kwenzeka dîbà adi, pìikalà Ebèlù 13.8 ewu mwambe nè: “Yesù Kìlistò, umwèumwè awu makèèlèlè too nè kashidi,” nudi nwitabuuja nè bìdì mwà kwenzeka bwà twètù kumòna Nzambi anyi? [“Amen.”] Mmunyi mutùdiku bafwànyine kuMumòna? Mu dimwèneshiibwa dyà Nyumà Wendè, Buumùntù Bwèndè bùdì nè mwoyi. Nudikù bafwànyine kwitabuuja aci anyi? [“Amen.”]

²⁴⁸ Nèndombèku bàna bèètù bwà kabàsambididi bwalu ebu paanyimà pààpa to, nsambidilaayi ànu mèmè. Batèèleji bôbò, ewu musangu. . . Netwikalè nè disangisha mu matùkù makesè emu, nènku pàmwàpa netùbàpetè.

²⁴⁹ Ndi muswè bwà batèèleji aba biikale mu bukòntononyi bùmwèpelè. Ndi muswè kwangata nyumà eyi mu bukòntononyi bwànyì, mu Dìna dyà Yesù Kìlistò, bwà butùmbi Bwèndè, bwà Nyumà Wendè wàmòna mwà kukwàta mudimu nè kunùjaadikila nè Yèyè ùcidi ànu nè mwoyi.

²⁵⁰ Ndi ngàngata Dìyi Dyèndè kaaba aka. Mbambè nè, Yone Munsantu, Yone Munsantu nshapità wa 14 ku mvensà wa 12,

mmwambè nè: “Ewu udi ungiitabuuja Mémè, byenzedi bîNdi ngenza yêyè neàbyènzè pèndè.” Nudi nwitabuuja nànkù anyi? [Disangisha didi dyàmba nè: “Amen.”—Muf.]

²⁵¹ Dìbà adi, yònsò wa kunùdi nwênù bàdi kuntwaku, bàdi bàsaamà anyi mu lukèngelu lwà bintu abu, anyi biikàlè nè dikèngela dyà cintu kampàndà, nùsambilaàyi. Lenga wèwè ànu cyanààna, vùlukà's, cizemba cyà civwàlù Cyèndè. “Yêyè m’Mwakwidi Munène udi mwà kulengiibwa kùdi dyumvwa dyà mateketa ètù.”

²⁵² Bible ùdi wàmba nànkù anyi, bânà bèètù? [Bânà bèètù abu bàdi bàmba nè: “Amen.”—Muf.]

²⁵³ Nè pashìishe mmunyi mùvwàYe mufwànyine kwenza maalu, bu nè Yêyè ùvwa Mwakwidi Munène? Mùshindù wùm wèwùm wè wàkenzàYe pàvwàYe pànwapa awu, bwalu Yêyè ùdi Mwakwidi Munène umweumwe awu. Mmunyi mùvwàYe mufwànyine kucyèenza? Pàdi mubidi Wèndè Mulàmbù pa Nkwasa wa butùmbi wa Nzambi, mmunyi mùdiYe mufwànyine kucyèenza? Wàkaaluja Nyumà Wèndè, Nyumà Mwimpè. “Nè Yêyè neàngatè maalu àdi Àanyì awu, nè neànùleejèwu.” Mpindyewu, wèwè muswè kumòna Nzambi ní. . .

²⁵⁴ Cìdi cyenza nè nshìndamijilè eci pa cyòcì eci, mumanyè eci nè, ndi mumanyè nè Mukenji wùndi nyiisha bantu m’Bulelèlè. Ndi—ndi—ndi ngiitabuuja nànkù nè mwoyi wànyì wònsò. Nànsha nànkù, Didi dikòsa *apa*, ndambù mu mùshindù *awu*; kabìyi bwà kwikala nè lonji to, kabìyi bwà kupangakanangana to, kàdi bwà kwikala nè meeji matòòke. Nènku, ki bwà cinyi, ndi mumanyè nè Yêyè ngudi mwambè nànkù. Bu Yêyè mwà kwangata bintu bìvwà byà kùdi Nzambi. . . Nè bìvwà bikèngela bwà eci cìnùmanyishèci. PiikalàYe wàngata bintu byà Kilistò, nè ùnùleejabì, nè ùnùleeja bintu bìcilwalwà, nè kwenza byenzedi mene byàkenzàYe abi, s’ki Nyumà Mwimpè awu. Ke cìdici nè cyà kwikala.

²⁵⁵ Sambilaayi mpindyewu, nè lengàayi civwàlù Cyèndè. Mémè nèndilekèlèlè kùdiYe, nè kumòna ciikalàYe mwà kunwàmbila. Sambilaayi ànu cyanààna.

²⁵⁶ Kùdikù bàmwè mwab’ewu bàtù kacya kabàyikù banji kubwela mu masangisha kwònsò eku anyi? Nudikù mwà kwela cyanza muulu anyi? Eyowà, bàdikù bààbùngi.

²⁵⁷ Vùlukàayi nè, Yesù Kilistò kacya musangu nànsha wùm wè kàtu mwànji kwamba nè ùtu òndopa bantu to. Yêyè wàkamba nè: “Kì m’Mémè udi wenza byenzedi to. N’Taatu Wanyi,” nè mu Yone Munsantu, nshapità mwi5 ku mvensà wa 19.

²⁵⁸ PààkapicilàYe ku ciinà cyà màyi cyà Bètesdà, nè mwômò amu mùvwà misumbà minène, yà bantu bààbùngi, pàmwàpa binunu byà bantu balàadika mwaba awu, balèmà, mpofo, bilèmèndà, bakònyàngàlè bidimba, Wàkaya kùdi muntu uvwa pàmwàpa nè disaamà dyà mpàcì wa mēnyì, anyi ùvwa mufwànyine kwikala

nè disaamà dyà cyádi. Dìvwa dinènge, ùvwa naadi munda mwà bidimu makùmi àsàtù nè mwandamukùlù. Ke kumwambilaYè nè: “Ambùlà kalààlù kèèbè aku ùye kwèbè kumbèlù.”

259 Muntu awu ùvwa mwà kwenda. Wákamba nè: “Pàndi mpwekakù, muntu mukwàbò. . .” Kàdi kùvwa bantu mwaba awu mu ngiikàdìlù mutàmbe kubìipa kupita mùvwàye yèyè.

260 Kàdi Yesù ùvwa mumanyè nè yèyè awu ùvwa mwaba awu, nè mumanyè nè yèyè ùvwa mu ngiikàdìlù awu. PààkaMukonkàbo, Wákamba nè: “Bulelèlà, Ndi nnwàmbila nè, Mwànà kèna mwà kwenza cintu nànsha cìmwè mu Yèyè mwinè to. Kàdi cidiYe ùmòna Taatù wènza aci, ke cidi Mwànà wènza mwomùmwe.”

261 Ke ngiimànyìnù Wèndè umwèumwè awu leelù ewu. Kakùtu mupròfetà nànsha umwe, muntu nànsha umwe kàtukù mwànji kukùmbana bwà kwenza cintu nànsha cìmwè to pa kuumusha budishikaminyi bwà diswa dyà Nzambi, ncyà bushùwà, cìikalà Nzambi mwà kwenza aci.

262 Ncyèna mumanyè to. Ndi muswè nè, bu. . . Ke bwà cinyi. Ndi mumanyè musùmbà wà bambi bàdi basòmbe apa aba. Kakwèna bààbùngi bapite kuntu kwàka bàndi mumanyè to. Bu mèmè mwà kuMumòna pa muntu kampàndà, ndi mufwànyine kuteeta, bu mèmè mwà kuswà, ndi ngàmbila bantu nè mvwa mubàmanyè.

263 Sambilaayi, kàdi nùmonèbi ní Ùcidi ànu Mwakwidi Munène udi mwà kulengiibwa awu. Aci’s ncifwànyine kuMutèèka ànu kaaba aka kumpàlà kwètù eku, nènku nenùfwànyine kumòna nè Yèyè ùdi kaaba aka. Ncyà bushùwà anyi? Ambàayi nè: “Amen.” [Disangisha didi dyàmbe nè: “Amen.”—Muf.] Ncifwànyine bushùwà kuMuvwija kaaba aka. Ikàla wèwè ànu nè diitabuuja.

264 Inàbànzà mutekète nyèyè ewu musòmbe mwab’ewu nè mutù wèndè mwela muulu, ùsambila nè mwèndè mwònsò. Yèyè mmulwàte nkooci wa màyi à matàmbà, musòmbe mwaba wàwa. Ùdi munkaci mwà kusambila bwà lutàtù lùdi mu mutù wèndè. Bwà nè yèyè. . . Cidi cìmutàcisha. Ncyà bushùwà anyi, inàbànzà? Elà cyanza cyèbè muulu pìikalàbi nè ncyà bushùwà. Pìikalàbi nè ndi mwenyi kùdi, kupa cyanza cyèbè kumpàlà nè paanyimà. Cyàkuumukù mpindyewu.

265 Ambà tǔng, udikù mwà kungaanyishila paùdimu apu anyi? Bukènkè abu mbutentèmùke buyè pa inàbànzà udi musòmbe ku luseke lwèbè aku awu. Ùdi munkaci mwà kusambila pèndè. Ndi muswè nnùkonkèku cintu kampàndà. Wèwè wambi nè: “Wamvùlukakù, Mukalenge.” Èyo, Yèyè wàkuvùluki. Udi usaama disaamà dyà mutù wà kapàla. Aci ní ncyà bushùwà, elà cyanza cyèbè muulu, unyukushè cyanza cyèbè. Èyo. Ki bwalu mbwòbù abu’s. Nwamònu anyi?

266 Nudi nwitabuuja anyi? Mpindyewu: “Katanci kakesè bàà pa buloba kabààkuMumòna kàbìdi to.” Konkàayi bakàji abu. Nudi babàmòne. Bàkonkaayi ní ndi mubàmanyè.

267 Mwab'ewu, ke nsongààlùmè ewu musòmbè kaaba aka, ùsambidila tatwèndè. Kacya ncitukù mwànji kukumanya to. Ncyèna mumanyè nè wèwè udi nganyì to. To. Ncyèna mumanyè kantu nànsha kàmwè pa bwalu bwèbè to. Kàdi udi munkaci mwà kusambidila tatwèbè. Kèna apa to. Ùdi dyàmwmwà dyà mâyì manène mwaba kampàndà. Ùdi ùsaama dĩaamà dyà cìfù. Ùdi mu Puerto Rico. Aci's ng'EMU MMÙDÌ MUKALENGE WÀMBA. Ncyà bushùwà. Udi witabuuja.

Nudi bumvwe cìndi muswè kwamba aci anyi?

268 Inǎbànza nyèyè ewu musòmbè mwab'ewu, ùmwèka mulengìbwe, nè cìfulu cikunze kumutù. Mandamu Aldridge, Aldridge. Uh-huh. Èyowà. Ùdi ùsaama dĩaamà dyà mwoyi. Udi witabuuja nè Nzambi neàkwondòpè anyi? Èyo.

269 Udi ungenzelakù dyèsè anyi? Kùdi inǎbànza musòmbè mulondèle mwaba awu, dyèndè nè Mandamu Cook. Mandamu Cook ùdi nè mikòlò yìsaama. Ncyà bushùwà. Màndàmù Cook, elà cyanza cyèbè muulu. Mèmè mwikàle mwenyi ànu wa menemene ewu, elà cyanza cyèbè muulu. Èyo. Ikàlà nè diitabuuja kùdi Nzambi.

270 Tentèkèla mukàji udi ku luseke lwèndè awu cyanza. Yèyè m'Màndàmwànzele Russell. Ùdi ùsaama dĩaamà dyà bisùlùsùlù. Elà cyanza cyèbè muulu, Màndèmwàzelè Russell, nè ùcìtábùùjè nè mwoyi wèbè wònsò, mèmè mwikàle mwenyi kùdi.

271 Kàdi bìshi bwà udi ulonda? Èyowà. Cintu cìmwèpelè cìdi cìkèngela wèwè kwikala naaci ndiitabuuja.

272 Inǎbànza udi ku luseke lwèndè awu ùdi ùsaama dĩaamà dyà cìfù, yèyè pèndè, nè dìnà dyèndè m'Màndàmù Dillman. Wèwè mwitábùùjè nè mwoyi wèbè wònsò, udi mwà kwikala nànkù.

273 Màndàmù Harmon, udi musòmbè ku luseke lwèndè awu, mmufùme ku lùpitaadi. Mmupetè di—dipandiibwa bwà dĩaamà dyà—dyà ciseesukidi. Udi witabuuja anyi, Mandamu Harmon? Wèwè mwitabuuje nè mwoyi wèbè wònsò, udi mwà kwalukila kwèbè kumbèlu, kuumvwa bimpè.

274 Mbanganyi bàdi bìitabuuja mpindyewu?

275 “Katanci kakesè aka bàà pa buloba kabààkuMmòna kàbìdì to.”...?...Cìndi nteeta kwamba ncinyi? Vùlukààyi nè, Yesù ngwakalaya. Yesù wàkamba nè: “Néngìikalè neenù, munda mwènù mene, too nè ku ndekeelu kwà buloba. Byenzedi bìNdi ngèenza nenùbyènzè pèènù.” Kuvùluka nè Yesù wàkalaya bintu ebi, Yesù ùdi ùbifikisha ku dýenzeka.

276 Mpindyewu, kàbìdì, vùlukààyi nè Yesù wàkalaya, nè: “Ewu udi ungiitabuuja Mèmè ùdi nè Mwoyi wà kashidi.” Nwènù bàvwà beelè cyanza cyènù muulu, katanci aka abu, paanyimà pàà mudimu wà dyondopa ewu nudikù mwà kubànda kùneeku mpindyewu nè kwimana kaaba aka bwà disambila anyi? Yèyè

wàkalaya bwà kufila Mwoyi wà Cyendèlèlèlè ànu mwàkalayàye bwà dyondopa amu.

²⁷⁷ Mpindyewu, nuwaku bamanyè nè Yèyè wàkalaya cyôci eci kâbîdi anyi? “Bimanyinu ebi nebîfilè aba bâdi biitabuuja. Bôbô batentèkèlè babèèdi byanza babèèdi nebàsangalè.” Nudi nwitabuuja nânku anyi? Mpindyewu tentèkèlàngànaayi byanza muntu nè mukwèndè dîbâ adi. Nwamônus, Yèyè ùdi kaaba aka. Ncyèna mwà kunwòndopa to. Ûkaadi mumanè kucyènza. Mpindyewu tentèkèlè muntu kampàndà byanza, nè ùsambidilè muntu kampàndà, ànu udi ku luseke lwèbè awu. Amen.

²⁷⁸ Mpindyewu inyikaayi mitù yènu nè nusambile ànu munùtù nusambila mu èkèleeziyà wenù amu. Sambilà nè: “Mukalenge Nzambi, ondòpàku muntu ewu. Muntu ewu ùdi munkaci mwà kunsambidila.” Nènkù lombaaayi ànu Nzambi bwà kwondopa nè kusàngaja. Cîtàbùùjè nè mwoyi wèbè wònsò. “Mukalenge, ndi ngiitabuuja nè Yesù Kilistò, ùdi umweumwe awu makèèlèlè, leelù, too nè kashidi.” Dîyi Dyèndè kadyèna mwà kupangilakù to.

²⁷⁹ Vùlukàayi, Yèyè wàkalaya nè: “Katanci kakesè bàà pa buloba kabààkuMmòna to.” Kabèèna bàMumòna mu mbilu yà mbwa dilòòlò edi to. Kabèèna bàMumòna mu sèndèmâ to. Kabèèna bàMumòna mu èkèleeziyà yà kwisùkwisù eyi to. Kàdi nudi nuMumòna. N’yèyè ewu kaaba aka. Vùlukàayi nè, Yèyè ngudi mucilayè, nè Yèyè ùdi kaaba aka bwà kwandamuna ku disambila dyèbè nè kukupèèsha dijinga dyà mwoyi wèbè.

Tentèkèlàngànaayi byanza muntu nè mukwèndè nè sambilaayi.

²⁸⁰ Mukalenge Yesù, ndi mulwè, mwikàle mvùluka nè Wèwè wakamba nè: “Mu Dîna Dyànyì bôbô nebîipatè baadémons.” Nè ndi ngiipata nyumà yònsò wa bupidyà kule nè batèeleji aba, kule nè bantu aba, bwà butùmbi bwà Nzambi. 

63-0122 Kuvùluka Mukalenge
Southside Assembly Of God
Phoenix, Arizona États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibanza cya luntandala, kulamiibwa mu cikâlwilâ, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngâ bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org